

KOPI MO FAASAOSAOGA TALAFEAGAI A SUI USUFONO

ASO LULU, 21 MATI 2018

Na nofoia le Nofoa e le Fofoga Fetalai i le itula e 9:00 i le taeao.

Tatalo.

FOFOGA FETALAI: Ou te faasilasila atu ua toe amatalia nei Taulumaga a le Fono Aoaofa Fautulafono.

MALELEGA MAI LE AO O LE MALO

Na fofogaina e le Fofoga Fetalai le Malelega mai Lana Afioga Mamalu, O Le Ao o le Malo.

“TUSI mo:

Le Fofoga Fetalai:

E tusa ai ma le Mataupu 59 o le Faavae o le Malo Tutoatasi o Samoa, ua ou tuuina atu nei le maliaga i le Fono Aoaofa Fautulafono na te iloiloaina ai le Tulafono Tau Faaofi ua faaalua iinei:

1. Tulafono Tau Faaofi o Teuteuga o le Tulafono o le Fetufaaiga o Faamatalaga Tau Lafoga 2018.

TUUIINA ATU i lou nei Lima i lenei aso 20 o Mati 2018.

**(Sainia): Tuimalealiifano Vaaletoa Sualauvi II
O LE AO O LE MALO.”**

FAASILASILAGA MAI LE TAITAI O LE MAOTA

Na fofogaina e le Fofoga Fetalai le Faasilasilaga mai le Taitai o le Maota.

E tusa ai ma le Tulafono Tumau 100(2), ua tuuina atu le Faaaliga i le Fono Aoaofa Fautulafono mo le iloiloaina o le Tulafono Tau Faaofi ua taua i lalo i lona Tulaga Faanatinati.

1. Tulafono Tau Faaofi o Teuteuga o le Tulafono o le Fetufaaiga o Faamatalaga Tau Lafoga 2018.

TUUINA ATU i lenei aso 20 o Mati 2018.

(Sainia): **Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui**
TAITAI O LE MAOTA.

**TULAFONO TAU FAAOFI O TEUTEUGA O LE TULAFONO O
GALUEGA TINEI MU MA FAALAVELAVE TUTUPU FAAFUASEI
2018 – faitauga faatolu**

Susuga Hon TUILAEPA AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI (Palemia): Lau Afioga i le Fofoga Fetalai ou te tulai atu ma le agaga faaloalo e faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Galuega Tinei Mu ma Faalavelave Tutupu FaaFuasei 2018 i lona faitauga faatolu.*

Faaluaina e le Minisita mo Pisinisi, Alamanuia ma Leipa.

Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoao Faitulafono.

**TULAFONO TAU FAAOFI O TEUTEUGA O LE TULAFONO O
TULAGA MAMALU MA FAAILOGA TAUALOA 2018
– faitauga faatolu**

Susuga Hon TUILAEPA AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI: Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Tulaga Mamalu ma Faailoga Taualoa 2018 i lona faitauga faatolu.*

Faaluaina e le Minisita mo le Soifua Maloloina ma le Minisita mo Pisinisi, Alamanuia ma Leipa.

Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoao Faitulafono.

**TULAFONO TAU FAAOFI O TEUTEUGA O LE TULAFONO O LE
FAAFOEGA O KASINO MA TAALOGA ESEESE TAU TUPE 2018
– faitauga faatolu**

Afioga Hon LAUTAFI FIO SELAFI PURCELL (Minisita mo Faalapotopotoga Tumaoti a le Malo): Lau Afioga i le Fofoga Fetalai, lau Afioga ou te tulai atu ma le faaaloalo tele, ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o le Faafoega o Kasino ma Taaloga Eseese Tau Tupe 2018 i lona faitauga faatolu.*

Faaluaina e le Minisita mo Tagata Tafafao Maimoa mai Fafu ma le Minisita mo le Soifua Maloloina.

Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoaofa Faitulafono.

**TULAFONO TAU FAAOFI O TEUTEUGA O LE TULAFONO O LE
FAALILIUINA O FANUA FAALE-AGANUU 2017 – faitauga faalua
– felafolafolaiga faaauau mai le aso fono ananafi**

FOFOGA FETALAI: E tolopo Taulumaga ananafi ua maea ona saunoa le sui usufono mo Safata Sisifo, ua manino foi ia i latou e toafitu o sui usufono na tutulai mai e fia saunoa e tusa ai o lenei Tulafono Tau Faaofi.

Ma o le mea la lea ou te tapa ma le faaaloalo lau Afioga i le sui usufono mo Faleata Sisifo e tulai mai e saunoa.

Tofa LEALAIPELE RIMONI AIAFI (Faleata Sisifo): Faafetai i lau Afioga i le Fofoga Fetalai, ua maea foi ona sii le faafetai ma le viiga i le Atua i Lana tausiga ma Lana pule faasoa i lo outou soifua ma lo tatou ola.

E faatalofa atu i lenei taeao i lau Afioga aemaise foi le Taitai o le Malo ma le Kapeneta, ae a sui usufono mamalu uma o Samoa ma le Fonousu a Samoa i lenei taeao. Malo le soifua, malo le lagi e mama.

E faatulou foi i le faafofogaaga a Samoa i ona tulaga faalupe mai Lana Afioga Mamalu, O Le Ao o le Malo, le Aufaitatalo ia ma Samoa ua potopoto ma faafofoga mai i lenei aso, malo tatalo, malo le tapuai mai a o alofaiva le Palemene aua le talanoaina o mataupu ma Tulafono aua le atinaeina ma le faaleleia o lo tatou Malo.

Ae o le a fai sina manatu puupuu lava i le Tulafono Tau Faaofi lenei. Faafetai lava i lau Afioga ua toe maua le avanoa o nisi o matou e avatu ai ni o matou manatu i lenei Tulafono Tau Faaofi. Leaga o i inei i le Fonousu a Samoa, o i inei e avatu ai le faamalamalama o mea uma. Aua a malamalama i tatou, e tatau foi ona malamalama le atunuu leaga o le galuega faitele a tatou o le tatou matafaioi, e faamalamalama o tatou itumalo ma o tatou aiga i auga moni auga autu o so o se Tulafono, aemaise Tulafono maaleale faapenei.

Ua le o po se lilo i le tulaga o i ai ia le fai pea o manatu i nisi e le o malamalama lelei i lene Tulafono Tau Faaofi. Ae ua lailoa foi le Malo ma le Taitai i le taumafai e faamalamalama pea ma faamalamalama pea lenei Tulafono Tau Faaofi. Ae faafetai, ua maua le avanoa ia matou se i avatu ai ni a matou motugaafa ma ni mau maumaututu e lagolago ai le Tulafono. Leaga o fanua,

pau lea o le sootaga o le Samoa a o se matai i totonu o le atunuu lenei, pau lea o le tofi o fanua. A leai se fanua, le aoga le matai. O le faapea mai la o nisi o latou ua pele ia latou fanua Samoa, a o tatou lea e lagolagoina ma faia le Tulafono, e tatou te tuusaunoa ma leai so tatou lagolago ma taofi mamau o tatou eleele, o se mau le faavaea ma vaivai tele. Leaga o le matai e le pele ia te ona eleele, sa le tataua ona matai, ma e iuvale foi. O le Tulafono Tau Faaofi lenei pei ona tuuina mai i le 2007, o nisi o tatou sa i ai i lea taimi, le taimi lea sa matou i le Itu Agai. E leai se Tulafono, e silafia e lau Afioga, e leai se Tulafono e oo mai i le Maota lenei e le faitaua ma fai i ai sou manatu, leaga e taua. O le mea ou te faafetai ai i le Afioga i le Minisita o le toe sue mai i tua, na toe sue mai lava lau lauga i le Tulafono lenei sa faia i le 2008, e matua manino lava pe a toe faitau i ai. O le mea tonu lava lea sa ou lagaina i lau lauga ma ou faamamafaina, o le mokesiina o lisi o fanua. Leaga o le mea tonu lava lea ma le auga lea o le tetee o le tagata i le taimi nei.

O le lisiina o fanua pei ona outou silafia, ua leva ona faatino mai. O le itumalo lenei o Faleata, na amata loa ona lisi fanua, lisi loa ma ona fanua. Po o le 25% i le 30% o fanua o Faleata na lisi mai lava i le taimi lea se i oo mai i le taimi lenei. O le tele o atinae lea e fai i inei i le itumalo lenei, o la e fai i luga o fanua lisi, lisi mai lava i le taimi lea ma maua ai tupe ma manuia. A o le fesili la, e i ai se fanua o fanua nei talu ona lisi mai ua mafai ona faataueseina atu po o i ai se popolega faapea o le a mamulu atu? E leai ma se mea o i ai. O le vilimaa lea e fai nei i o i Vaimoso-uta, ua leva ona fai mai ua tausaga, lisi e le Malo, lisi e kamupani eseese, ae ua o ese latou, ae o la e taatia lava fanua o le itumalo, faasolo atu i ai ma fai atinae, e leai ma se mea o afaina. O fanua nei, na vevesi foi nisi o lo matou itumalo i fanua nei, tetee i le Malo....

Tofa Olo Fiti Afoa Vaai (Salega Sasae): Lau Afioga i le Fofoga Fetalai, e na o sina mea lava lea e fia faasao.

FOFOGA FETALAI: E faamalie atu i le sui usufono mamalu o lo o saunoa, se i tulai mai le sui usufono mo Salega Sasae mo lana faauilavea.

Tofa Olo Fiti Afoa Vaai: E leai lava se manatu e faalavelave i le saunoaga a le Afioga i le Sui Minisita. Ae o lea ou te manatua le lauga a le Sui Minisita a o matou faatasitasi atu i i, sa ave lana faasea i le Malo i le tulaga o fanua o lona afioaga i Vaitele lea ua avatu nei e le SLC ma tulaga uma faapena, sa amata lisi fanua na e i Vaitele, e le i atoa lava se lua tausaga ae faatau loa. A? O lea la e oo mai i le taimi lenei o la ua mafai ona faatau uma lava fanua o lona itumalo i le tulaga lea sa faasea ai foi le sui usufono. A o si ou uso sa ma i i....

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai....

FOFOGA FETALAI: Malie lava le sui usufono, se i tulai atu le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: E sese le faasilasilaga lea e faapea ua faatau uma, e leai, o la e i ai fanua lisi, o le faasaoga lena. Ma e eseese lava ia faalapotopotoga a le Malo. E pei o le aumai o isi mea e faafenumiai ai

isi mea, se o tatou, ua leva ona tatou faipule. E ese lava ia vaega ia a le SLC, ese le Tulafono lea e tatou te talanoaina e i lalo o le MNRE.

Lau Afioga i le Fofoga Fetalai o le tulaga lena o lea e talanoa ai, ae o i i le vaega lea, o la e i ai ia fanua lisi i le vaega o Vaitele, o la e i ai lesi vaega o la lava e lisi.

FOFOGA FETALAI: Malo faafetai ua manino lea vaega. Tulai mai le sui usufono mo Faleata Sisifo.

Tofa LEALAIPEPULU RIMONI AIAFI: A fia manao si ou uso e avatu le kopi o le Hansard lea e ia te au, ia ona afio mai se i uma avatu i ai sana kopi, po o i ai le mea lea e saunoa i ai. E sao, e i ai le taimi ae ese le Tulafono, a o fanua ia nisi o fanua ia na ave, taipei lava o fanua lea na laga mai e le sui usufono mai Vaimauga Sasae, o fanua ua uma ona faatau, e le o ni fanua faaleaganuu, e ese le mea lea e tatou te talanoaina, o fanua faaleaganuu, ese fanua ia ua uma ona ave e Siamani, o fanua la na o lea sa ou toe talosaga ai, e toe maua nisi fanua faaopoopo e lisi mai, ona o fanua, o fanua ua uma ona faatauina ma ua i le Malo. A o fanua ia tatou te talanoa ai o lea ou te talanoa atu ia Faleata atoa o lea e faafofoga mai le atunuu i le aotelega o Faleata, o fanua faaleaganuu, ma e i ai foi la ma fanua nei. E le lilo le vevesi ai i le amataga, nisi o afioaga o le matou itumalo. A o le mea lea e auga i ai lou manatu, o lea la ua toe fiafia nei ma aeae, ae leai se mea o lea ua tapuvaetasi uma i Faleata mea uma. Ma o galuega, o faamanuiaga, o mea uma na. Pau lava le suiga na aumai e le Tulafono lea ua toe faamamafa mai i i ina ua laga i le taimi lena, ina ia puipui le lisi lenei.

O le lisi, e le o lisi o le fanua, o le lisi, o le mokesi faamalulu atu, o le mokesiina o le lisi, e le o le mokesiina o fanua, lea e manino lava i le Tulafono i le vaega 7 o le Tulafono. A faaletonu foi la ia le atinae, lea e tau faamalamalama mai e le vaega 20 o le Tulafono vaega 7(3) o le Tulafono, e le mafai, e le agavaa le tagata la e lisi la e mokesia le lisi e fai se tagi e faasaga i le fanua. E na o le lisi lava lea tatou te talanoa ai, e le afaina le fanua.

Sa ma faia ma le tamaloa mai Amerika malae tapolo tele la e i le malaevaalele, 170eka na ave i ai e fai lana atinae, lisi i ai, fia sefulu miliona na faaalu ai, uma na fai le atinae, lelei le agaga na fai ai, ia ae ua le mafai foi ona toe faaauau, toe foi le tamaloa ia, ae la e tumau lava fanua o le Malo ma le atunuu, e le o alu ma ave, e le o alu ma ave, toe foi lava ia ma ave ana tupe ae la e tumau lava tatou fanua. E oo mai nei ia mau maumaututu lea tatou te talanoa ai ona o lea e pei ua faapopoleina tatou ae ia te au lava ia ou te faafetai ai, o lo o ua aumai tonu lava e le Malo. O le Malo e faamalumalu i le faiga o mea nei o lisi, aua a faaletonu e toe foi lava i le Malo, e toe foi lava i le Malo pe a faaletonu lisi nei, aua o le tele o tatou o lea e i ai lava le popolega i tatou faia lisi....

Tofa Olo Fiti Afoa Vaai: Lau Afioga i le Fofoga Fetalai, ia lea la ua manino mai ia le vaega lea i le saunoaga a le sui usufono mamalu....

FOFOGA FETALAI: Ia, se i tulai mai le sui usufono o Salega Sasae.

Tofa Olo Fiti Afoa Vaai: Ae o le atugaluga foi lena lea e i ai i le atunuu i mea nei o lisi, ia lea la ua toe foi ia le sa lisi le mala tapolo, ae la ua mau ai lava le fanua ua leai se isi mea e toe fai i ai, ua vaoa ai lava vaeatu le paia o le

Maota. Ia ua le mafai ona toe o i ai nisi i luga o le fanua lena, ona o la e tumau lava le lisi a le investor pe a faapena ae la ua alu ua toe foi. Ia a ua i ai la nisi mea ua toe fia fai i le fanua nei, ae ua fiu e faatalitali le taimi e uma ai le lisi.

FOFOGA FETALAI: Masalo Ia ua maua atu le manino, e ese le manaia o le faamalamalama a le sui usufono o Faleata Sisifo le tulaga o le mau muamua lea na e aumai lea lava ua manino. Se i toe tulai mai lava le sui usufono o Faleata se i toe tali le isi fesili lea e toe faapupula atili ai....

Tofa LEALAIPEPULU RIMONI AIAFI: Faafetai e aoga le fesili a le sui usufono. A foi o le mea lea e tatalo atu ai i lau Afioga, e aoga le aumai o fesili i totonu o le Palemene, ona maua lea o le faasaoga a o faafofoga mai Samoa, aua o le o lea ave i tua, ia ona fenumi ai lea. Ae aoga lava le fesili a le sui usufono, o le lisi, la ua foi le tamaloa, tumau lava le lisi i i nei ia tatou, ua cancel foi ma lana lisi, leaga o la e i ai ia aiaiga i totonu o le lisi, a fai fai lau kamupani ma lau atinae e le lelei, toe aumai le lisi a le Malo, cancel lau lisi toe foi. E mafai ona ou avatua le kopi o le lisi....

Afioga Sulamanaia Fetaiai Tauiiili Tuivasa (Vaimauga Sasae): Lau Afioga i le Fofoga Fetalai pe maua se avanoa o le sui usufono, o le mea e fia faasao faamolemole.

FOFOGA FETALAI: Ia saunoa le sui usufono mo Vaimauga Sasae.

Afioga Sulamanaia Fetaiai Tauiiili Tuivasa: Ou te tulai ma lou agaga faaaloalo, o se uo foi ia te au le Sui Minisita o saunoa nei. E pei o lea ua maua i lenei taeao e pei ua tali mai le Malo, e pei o le agaga lena e tau avatu ai se manatu, o latou lea e i o, o lea ua saunoa mai lava ia o lea ua tali mai le Minisita, ae faamolemole, pe mafai ona aumai pea ia le avanoa i i nei se i sausaunoa atu lenei itu. O la ua saunoa na ia, o la ua malamalama lava latou aua foi o la e i lalo o le vaaiga a le Minisita, lea la e leai se mea o popole i ai le sui usufono. Ae faamolemole pe aumai e aua ne i toe saunoa se isi i o, aumai se avanoa i i nei se i avatu ai finagalo o lenei Itu. E pei o le agaga lea o lea lava e tau avatu i lau Afioga i le Fofoga Fetalai.

FOFOGA FETALAI: Ia, se i tau faapupula le vala lea. Malie le sui usufono o Faleata Sisifo se i tau faapupula le vala lea. Leaga o lea tou te tulai e fia faasao ma fesiligia le saunoaga a le sui usufono, ioe ana tuu lava foi se i maea sei oo i le taimi tou te saunoa ma fesili i le Malo e auala mai i le Nofoa, e tali foi le Malo. Ae leaga o lea tou te faasaoa tou te fesili agai i le saunoaga a le sui usufono mamalu, ae lea foi ua tuu atu le avanoa.

Ae ua manatu foi le Fofoga Fetalai, e manaia foi le fai ma faalamalama mai e le sui usufono, e malamalama ai nisi o vaivai o lea e tau aumai i i mo se taimi muamua e faapuupu ai le tatou Fono. Ioe, ae afai la o i ai se sui usufono o fia laga mea ia na laga e isi sui usufono ma fesiligia ae lea ua aumai le tali ma faamalieina ai ia auofala, o lona uiga la, ia ua tatau foi ona aua le lauga.

Afioga Sulamanaia Fetaiai Tauiiili Tuivasa: Lau Afioga i le Fofoga Fetalai e leai se isi e malele lava lau Afioga e pau lava le agaga matou te le o

fia faalogo i se tali mai a se Minisita Lagolago. Matou te fia faalogo lava a o saunoa mai ma malele mai Minisita.

FOFOGA FETALAI: Ia ua lelei, ia ua lelei, faafofoga mai se i saunoa atu le Palemia, matua tou faigata tele.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai, lea sa ou faapea e atoatoa ona avatu e le Afioga Leala Grey le tulaga o le mataupu lea. O le mataupu lea, o la ua toe faatau e lona uso o Fred Grey ia le lisi, ia ua leva foi ona ou talanoa i ai, 'Sole, e faitau miliona tupe na alu i le mea lena. Se o ane e toe fai faalelei le course lea'. O le course lea na i ai, e leai se atunuu o le lalolagi i i nei i le Pasefika e faatusalia ia le international o le latou course e tai pei o le course lea na i ai. Matua international toe umi, e le so so i ai ia tatou courses ia e i ai, ae talu ai la o le uso o le alii lea e leiloa taaalo golf, ia la ua faapela ai, ae ua matua maimau tupe na alu ai a le tamaloa Amerika lea na sau faaalu i i nei, toe alu, ia la ua taatiatia ai lava le golf course ua vaoa. Lau Afioga o le sao lena lea na iu lava ina toe foi mai le lisi ia ma faatau e le kamupani la o le uso o le alii le la.

FOFOGA FETALAI: Ia, malo, tulai mai le sui usufono o Faleata Sisifo.

Tofa LEALAILEPULE RIMONI AIAFI: Faafetai lava i lau Afioga i le Fofoga Fetalai. O le sui le malamalama. O le mea lea ua tupu i lo tatou atunuu ma vevesi ai lo tatou atunuu, o le mea na tatou ola mai ai, e lua ituaiga tagata, o le tagata malamalama ma le tagata le malamalama. A ola faapea tatou, e ese le faigofie, ae oso mai loa i totonu ma le tagata le fia malamalama, o i ina la lea e i ai le faaletonu, e i ai tonu lava sui usufono ia e toalua.

Na saunoa le sui usufono o Vaimauga ananafi o ia o le taitai o le la itu, afai o le ituaiga taitai ia, aua ne i toe palota i ai se isi. E le o tali atu Lealailepule ia outou malilie lava outou sui usufono mamalu, o lea e lauga Lealailepule ia i lona manatu na aumai ai ia e lona itumalo e faamalamalama e fesoasoani i le tatou...leaga sa lauga ai foi i le mataupu lea, ma o lea tou te faafofoga mai, o lau lauga o le auga atoa....

Afioga Hon Faumuina Tiatia Faaolatane Liuga: Lau Afioga i le Fofoga Fetalai....

Tofa LEALAILEPULE RIMONI AIAFI: Faumui....

FOFOGA FETALAI: Ia, malie le sui usufono, saunoa le sui usufono o Palauli le Falefa.

Afioga Hon Faumuina Tiatia Faaolatane Liuga: Leai o lou fia malamalama, ona o lea e saunoa le...e fia faamalamalama mai lava e le sui usufono mamalu o lo o saunoa, ou te fia malamalama, aua o le lisi lea e talanoa ai e mokesi, e leai se value oi le fanua, it's a none, e leai se value. E faafefea la ona mokesi le fanua e leai se value? Se i vagana ua i ai improvements i luga o le fanua ona amata lea ona e iloa le value. Ou te leiloa la le Bank faavalevalea

e mokesi ai se fanua e leai se mea o i ai, o fanua nei e leai se value o i ai, faafetai.

FOFOGA FETALAI: Ia ona o lea e te fesili i le saunoaga a le sui usufono o Faleata Sisifo, ia ae saunoa mai lau Afioga maua se tali o le faafesili ma le fesiligia o lau Afioga, a leai ia.

Tofa LEALAILPULE RIMONI AIAFI: Ou te ofo ua leva ona ma uo, toetiiti ma momoe faatasi i po uma ae le fesili mai ona malamalama lea, ou te musu e faamalamalama, ona e vaivai tele le mea lea e fesili mai ai le Afioga i le sui usufono mamalu. Ae se i ma fetau lava maua i le mea e masani ona ma fetau ai, ia ona ou faamalamalama lea i le Afioga i le sui usufono mamalu le uiga o le mea lea. E moni, there is no economic le value lava ia i totonu o fanua lava ia tau Samoa, e tele le risk la e i ai pe a ave i le bank. O le mea lea e ala ai ona faatau le mea lea o le lisi, a feaveai lava lea o le lisi latou e mokesi, ae tumau lava le fanua, a improve la ia le fanua, ae ui i lea, o le a see ese ai lou mafaufau ma le mea.

O le auga autu lava lea o le Tulafono na ala ai ona fai nei e pei ona talanoa atu o le lisi ia ua leva ona fai mai, pe faafefea ona maua mai ni nai tupe e manuia ai tatou lautele ma le atunuu lalovaoa i fanua nei, lea na ala ai ona aapa le Malo e fai le tulaga lea, pau lava lea, pau lava lea o le auga o le mea. A o lea ua toso solo e tagata faapea. A tatou o nei i le atu-Aleipata i le mea la e fai ai faletalimalo e tagata mai fafo, e manuia faasoloatoa tagata na e i ai i ina. Aisea? Maua galuega, maua mea e fiafia ai, maua le tupe e ola lelei ai ma le o ai i fafo. Aua ana leai, a le alu i fafo, sau iinei Vaitele palota ia Lealailepule ma le faiaina ai lava Lealailepule. Aua o le mea lena lea e tupu, o le mea lena lea e tupu lea ua aumai e le Malo, e faafefea ona atinae ia le tatou atunuu e faaoga i ai ia le tatou eleele ia e i ai nei, ae ia fai i se tulaga e taofiofi mamau, maumaututu e le mafai ona faataueseina atu o le mea na, pau lava lena o le suiga lea mai le Tulafono na tatou pasiaina i le 2008 lea e i ai i le taimi nei.

Lau Afioga, o sina manatu puupuu lea e fesoasoani i le tatou mataupu, tau faamalamalama ai ma fesoasoani ia tatou e pei o le uiga o lau faamatalaga, o tatou, tatou te avatua le faamalamalamaga sili mo lo tatou atunuu ma o tatou tagata, ma aveese ai le popole ma le atugaluga lea i ai, ua oo ai i tulaga ma faamatalaga le talafeagai, a o le tele o nei matai ma nei tagata e faia e le o omai e tausi o tatou aiga ma tatou nonofo. O tatou, tatou feola, tatou feoti ma nonofo lava i Samoa ma vaai tatou fanua ma eleele. Manuia tele le Fono a Samoa, faafetai.

FOFOGA FETALAI: Faafetai, ia malo saunoa i le sui usufono mamalu o Faleata Sisifo. Tulai mai le sui usufono o Salega Sasae.

Tofa OLO FITI AFOA VAAI: Faafetai i lau Afioga i le Fofoga Fetalai ua maua se matou avanoa. Ia e avatu ai foi nai motugaafa ma ni vaivaiga o lenei itumalo e tusa ai ma lenei Tulafono ua felavasai ai ia finagalo o le tatou atunuu ia aemaise foi lava totonu o le tatou Palemene.

Lau Afioga i le Fofoga Fetalai e pei ona ou fai atu, ua tele finagalo eseese i lenei Tulafono i le tulaga o finagalo o sui usufono ae faapena foi finagalo faaalua o Afioga i Loia, ia ma nisi foi e lava lo latou tomai i le faaliliuina o lenei Tulafono. Ia ae ou te talitonu lava e aoga le fetufaai, fetufaai o mafaufauga ona

o le Tulafono e fai si taua, e moni foi la ua atoa le 50 pe 100 foi lava ia afioga i Loia o le tatou Malo, ia ae i ai lava ia mea foi ia e tau o loia matutua, ia o loia feoloolo, ia ma loia foi ia o la e tau amata e tuli so latou poto masani. Ia ae o loia la lea e i tua, ua lava lo latou tomai e aoga la lo latou fetufaai i le fesoasoani mai i le tatou atunuu i le taumafaiga o lenei Tulafono.

Lau Afioga i le Fofoga Fetalai, e i ai le itu taua o le Tulafono lenei ia te au, pe a fua lava i isi Tulafono ia e pei o le resitalaina o mea uma faapena, ona i lenei vaitau e le asa se aso foi lea ma se faamasinoga o Fanua ma Suafa, i tulaga o feeseeseaiga o aiga i o latou fanua. Ou te manatu lava o le resitalaina o fanua Samoa foi ia i lalo o le resitala, e pei e manaia e puipui mai ai i pulega faa-Sa'o, ona e i ai matai o lona aiga foi lea, ia ona tuu lava laia e tofu lava si matai ia ma si ona fasi fanua. Ae o le tulaga lea e pei e maitauina, e pei a leai loa pe ua alu i Niu Sila po o se isi atunuu o le lalolagi e toe foi mai ua leai se fanua lea sa faaigoa ia ai ma ai ia fanua ia i totonu o le lio o le pulega faa-Sa'o, pei o le isi vaega taua lena. O le isi vaega taua ia te au lau Afioga i le Fofoga Fetalai o le Tulafono lenei, o le faataitaiga tonu lava lea ma le faamaninoga lea o le mea lea e atugalua ai ia le tatou atunuu, i ona eleele faale-aganuu i le Tulafono lenei. Aua o lea ua mafai e le Tulafono lenei, ona tatala le tapu lea e i luga o le tatou Faavae. Silasila lau Afioga i le Fofoga Fetalai, i luga o le tatou Faavae la e i ai le matua tapu o le lisi, mokesi, o le faamauina ai o se aitalafu, e i ai la ma si tamai mea lena e follow mai ai po o se isi lava faiga e faia e le Malo i fanua faale-aganuu, ae oso mai loa la ma le pito i lalo lena i le Teuteuga, seia vagana o se isi lava Tulafono a le Malo e faatagaina ai, o lea la ua aumai le faataitaiga lea. Ma o le faataitaiga lea o le Tulafono lenei ua talepe ai le Faavae, i le mea lea e atugalua i ai ia le tatou atunuu i le faasa ma tapu ona faia ni faiga i o tatou eleele faale-aganuu. O lona uiga la o se manatu lau Afioga i le Fofoga Fetalai, afai o le faataitaiga lea, ae a oo atu i se aso a taeao ae toe agai mai le Malo ma se isi foi Tulafono e faatagaina ai le faamauina o ni aitalafu i fanua faale-aganuu, ua mafai. Ae oo foi ina agai mai le Malo ma se isi foi Tulafono e faatau ia fanua faale-aganuu ua mafai foi. O le popolega lena lau Afioga i le Fofoga Fetalai ia te au, ona o lea ua leai se malosiaga o le Faavae lea e tatou te faamoemoe e loka mai ai ia eleele faale-aganuu.

FOFOGA FETALAI: Se i tulai mai le Afioga i le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Ua ou le iloa po o le a le tulaga e tatau ona faamalamalama ai mea nei. Ua uma foi ona faamalamalama faafia ma faasalalau atu faasalalauga a le Loia Sili a le Malo, alu atu foi ia faasalalauga ma faamalamalama a Dr. Teleiai o le fomai o Tulafono, o lo o Faauluulu i ai ia le Komisi lea mo le toe iloiloina o Tulafono. Ua ou le iloa po o ua faasalalau faafia. E matua tapu lava le tulaga e faamatuu atu ai i tua i se tulaga o le faatau po o le mokesi ia fanua faale-aganuu. A o le aumai soo o le tulaga lea faapea ua malepe ia le Faavae. E faapefea ona malepe se Faavae? O le Faavae lea e fuafua agai uma i ai ia Tulafono. O le faalavelave ia o tamai loia ia e talanoa i ai le sui usufono, o lea na faamalamalama lelei mai e Dr. Teleiai, o le tilotilo pitotasi i le Tulafono. E le na o le tasi le Tulafono, a oo loa i mataupu lavelave, ia e vaavaai uma lava i Tulafono ia, ona faatoa mau ai lea o le atoaga o lou malamalama. E matua le mafai le mafai le mafai, ona faatau e se isi ia fanua faale-aganuu o lea e tapu i lalo o le Faavae. A o le faapea mai

ua malepe le Faavae. O, se ou te ofo i le ituaiga malamalama fou lea e aumai. E le o tapuina foi se lisi. Ia se i vaai o lea ua e matua e tau mai lava i i ua tapu i lalo o le Faavae ni lisi, e le o tapuina ni lisi. Se matua faavalevatea tele nei ituaiga manatu e aumai soo. Na o le pau lava ia le Loia e faalogo i ai le Malo ma le atunuu uma lenei, o le Loia o lo o aumai i le Faavae. O le Loia lena, o le Loia Sili a le Malo. E pau lava lea o le Loia e faalogo i ai le Malo. Leaga o le Loia o le Faavae. A o le Loia foi o le Faavae, e le na o ia e tolimasefulu faiai Loia ia e galulue ai. A o tamai loia ia, e tai tasi, e tai tasi tasi, sa tafafao tafafao i Niu Sila faatoa omai nei ananafi faaali le malamalama, malamalama le atoatoa. A saga aumai soo lava i inei e maumau ai le taimi o le Palemene.

Lau Afioga i le Fofoga Fetalai, se o ituaiga manatu nei e faaumiumivale ai le Fono a le Palemene.

Tofa OLO FITI AFOA VAAI: Lau Afioga i le Fofoga Fetalai, e tautala lava i le tulaga o le Faavae lea e tuu mai i i, a aveese la le Teuteuga la e i lalo, ua manaia tele.

FOFOGA FETALAI: Ou te le faatonuina le saunoaga a le sui usufono mamalu. Ae ona o tatou Tulafono Tumau e ao ona fesoasoani atu le Fofoga Fetalai ina ia fautuaina e le sui usufono, e see ese mai le finauga aua o lau lava lea faalepo ia po o se miti, ia po o lou lava lea finagalo e faaali o le sui usufono. Ia ae e le tasi se finagalo na fausia ai le Tulafono lenei ma le Teuteuga e pei ona tuuina mai e le Malo ma le Kapeneta ma i latou o lo o faapena ona faauluulu i ai ia Matagaluega e faapena ona latou fausia le fautuaga ma tuuina mai i le Malo. O le mea la lea, ia mama ia le sausau lau Afioga i le sui usufono mamalu, see ese mai i se isi mea e le o toe umi foi lou taimi.

Tofa OLO FITI AFOA VAAI: Ia faafetai. E faamalulu atu i lau Afioga i le Fofoga Fetalai, e le o se miti a Salega o le Tulafono Faavae lea e talanoa atu i ai lenei sui usufono ma le tulaga faaaloalo. E pei o le popolega lena lau Afioga i le Fofoga Fetalai, ona o le upu moni lava e tatou te le tumau i le Palemene lenei, e eseese foi o tatou lagona ma manatu ia ma ni lagona foi o e o le a fai mai e taitai lo tatou atunuu i le lumanai. Ae pei o tulaga na e tau avatu ai se manatu ina ia faataoto mamao le Tulafono, ae le mo le faamalieina o tatou taimi lenei.

Lau Afioga i le Fofoga Fetalai ona ou oo mai lea i le tulaga o mokesi lea sa saunoa i ai le sui usufono o Vaimauga Sisifo. E manaia le finagalo na faaalia, ae o lau lava mau lau Afioga i le Fofoga Fetalai, a tau loa le mea lenei o le investor, o mea o miliona, e le o ni tagata e ono omai i i e sue ni tupe e fai ai latou investments. Ae o lea ou te ofo i le tuu i ai e mafai ona omai e mokesi ia ni latou pisinisi i inei. O lona uiga o lau faatusaina nei, e leai lava la se eseese o investors na ma tatou lea e i inei. Na pau lava le mea e le o tutusa ai, e le o tatala mai ia tatou se avanoa e tatou te o e fai....

FOFOGA FETALAI: Ia se i tulai mai le faasaoga mai le Malo.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai o le faasaoga. E leai se mea e taofia ai o tatou tagata. Po o le faipisinisi mai fafo po o le faipisinisi i Samoa nei, e leai lava se mea e taofia ai o tatou

tagata mai le o e lisi ia fanua ma mokesi. Ou te taua soo lava le lisi lale o le Fonoti lale e lisi ai elelee o Lotofaga, ia o la e lisi, ae na fai mai mea nei e le i Tutoatasi le Malo o Samoa, ia ma e talu mai lava i lena taimi e oo mai lava i lenei taimi, e leai lava se fanua ua faapea ua momotu atu ma ua aveese ma ua faatau, se fanua Samoa. Ua fiu foi ia tatou Ofisa o Loia Sili e faafesili ia i latou nei o loia sa savali tetee, se i omai e aumai pe sa i ai se fanua na lisi ua mokesi ma ua motu ese atu. Ia e leai se mea. Na o le pau lava le latou tala, na o le faaalua o lo latou atugaluga ina ne'i te'i ua tupu i Samoa le mea la e tupu i Niu Sila ma Ausetalia. O lea na avatu ananafi lau faamalamalamaga. O le eseese o Niu Sila ma Ausetalia, e le o faia e i latou e ana ia fanua nei ia le Malo, e leai, e faapena foi ia Ausetalia. A o iinei le Malo o Samoa, o le Palemene lenei o matai uma lava. O le atunuu lenei e ana fanua ia e te lauga ai nei. O le tiute lea o tatou o matai, o le puipui o tatou fanua ina ia aua ne i mamulu atu se fanua faale-aganuu. Leaga o tatou fanua. O fanua o lo matou aiga o lea e i lalo o lau vaaiga i le tulaga na mafua ai ona ou matai, tiute faa-Matai. O tatou Loia la e tusia Tulafono, o isi o matai o le atunuu lenei. O le eseese la lena o Niu Sila ma Ausetalia ma Samoa. O le mea moni sa tatau ona fai, o le o o le vaega lea e o e savavali i o i Niu Sila ma savavali i o i Ausetalia ma faaali ai lo latou atugaluga, aua e le o tutupu i Samoa le mea lena.

O le tulaga lea i mokesi, a uma lava le mokesi o le lisi, ona uma lava lea, e fua i le taimi na fai ai, ae pule lava le aiga latou, e pule lava le aiga po o le faaumi pe leai, pule foi le aiga, pe lisi le fanua i se isi o latou, ioe. A manao foi se taulealea po o se isi matai e toe lisi fanua ia, e mafai lava ona fai. A o le tulaga la, ua totogi le tupe i le aiga potopoto i le fanua lea ua fai, ae le faapea se i omai ni tagata mai fafo ona faatoa mafai lea ona lisi. E lisi lava i so o sesi e aofia ai ma o tatou tagata ma tagata lava o le aiga ia.

FOFOGA FETALAI: Malo. Ia se i tuutuu maia i totonu le saunoaga a le sui usufono.

Tofa OLO FITI AFOA VAAI: Faafetai, na pau lava le, pei o lea e agai mai e ono faatusatusa i i i Niu Sila ma Ausetalia ma tatou tapatapa i mea na. A o le Tulafono lea e fai ai o tatou fanua, o le Tulafono a Niu Sila ma Ausetalia, o le Tulafono lena o lea e faaalu ai le mea lea. Pei lava o le mea lena o lea e fai ai faatusatusaga ina ia tatou nofouta i ai. Na pau lava le mea e fai ma aoaiga le vaega lea....

FOFOGA FETALAI: Ou te fautuaina le sui usufono mamalu e le faapea o le a ou tuuloa ona e le faapea o se agaga e tau tatai se faaiuga a le Nofoa i se finagalo o le Malo, ona o le tiute lava o le Nofoa ia e taumafai e tulei a tatou galuega ina ia vave ona tatou taunuu i le siui o le faamoemoe e tatau ona atinae le atunuu. Ae manatu foi lea e le faapea o le a...leaga e i ai le Tulafono Tumau e mafai ai ona faamuta e le Nofoa se saunoaga e aliai mai ai se faafinauga i se tulaga ua avatu le faamalamalamaga a le Malo, ia ae fai lava le mea o lo o finagalo i ai le sui usufono ia. A faamalamalama loa e le Malo se mataupu i totonu o le Palemene, ia o lena e tatou te limataitaiina ai mo lenei taimi.

O le mea la lea e faamalulu atu, tuu ou popolega o la ua faafofoga mai le itumalo ma Samoa, o lea e popole le sui usufono o Salega Sasae ina ne i tulai mai ia se tulaga i se isi 30 po o se 100 tausaga i le lumanai i se isi foi Paeaiga.

Ae tatou faamoemoe o le Atua e Faavae ai Samoa, ia e le mafai ona tatou see ese ae o lo o sisila fofoga o lo tatou Matai i le lagi.

Ia tulai mai le sui usufono ua tatau foi ona faamuta lou finagalo.

Tofa OLO FITI AFOA VAAI: Faafetai. Ia o le a leai se finauga i lea mataupu o la e faafofoga mai lo tatou atunuu ma tatou uma o lo o faafofoga ma molimauina le vaega lea.

I mea lava lea nei o mokesi lau Afioga na ona ou faamanatu atu faapea, e faamanatu atu le lisi lea sa fai i Taumeasina, le lisi lea na fai i i le Fale Suauu Popo. O mea na e lua o molimau na o le faaletonu o mea ia o lisi. Ae o le a ou see ese lau Afioga.

O le isi vaega lau Afioga i le Fofoga Fetalai, o le mea lea ua aumai i le Tulafono, ua aveeseina ai le malosiaga faale-Tulafono e latou te faia ai ni faaiuga i mea o feeseeseaiga o lisi ia....

FOFOGA FETALAI: Se i tulai mai le sui usufono mo Faleata Sisifo.

Tofa Lealailepule Rimoni Aiafi: Lau Afioga i le Fofoga Fetalai, leaga o lea e mau i a tatou Faamaumauga, leaga o lea e saunoa le sui usufono mamalu i le lisi lea o le Fale Suauu Popo, lau Afioga e lelei lava le fai ma aumai mau. O lea lava e fai ma oso le finagalo o le sui usufono i fanua palagi freehold ma fanua e i lalo o le Malo. O le tatou Tulafono, o fanua faale-Samoa, ma le faaaloalo lava, leaga e tatau ona faamanino le vaega lea, leaga e....

FOFOGA FETALAI: Sa ou tau soso atu i ai. O la e sao le saunoaga a le sui usufono o Faleata Sisifo. O lea lava e te tatai lava le tatou mataupu i fanua o la e i le SLC ua uma ona faatau i le fia selau tausaga, a o le tatou mataupu o fanua tau Samoa, o lea foi ua e taua ai foi isi fanua lea e i Vaitele e i ai le Fale Suauu ma mea faapena. E fiu lava alii e tau faamalamalama atu...O lona uiga e toe lua ou minute, leaga e te sailiili masei, e sailiili masei loa...se i fai atu le fautuuga a le Fofoga Fetalai, e sailiili masei loa le lauga a le sui usufono, ua e saili i le fetotoai, leaga o upu taoto na e teuteu ai le Palemene ma tausai ai le Palemene. E saili masei loa le saunoaga a le sui usufono, ua e saili le fetotoai o le Palemene. O le mea la lea, e toe lua ou minute.

Tofa OLO FITI AFOA VAAI: Faafetai. E faamalulu atu lava i lau Afioga i le Fofoga Fetalai ma le mamalu o le Maota. Sa ou talanoa i le mokesi ou te le i talanoa i ni eleele faale-aganuu, o le mokesiina lea sa ou talanoa ai i mea ia e lua.

Ae ui o lea lau Afioga i le Fofoga Fetalai, ona ou oo mai lea i le tulaga lea o le aveeseina o le malosiaga faa-Faamasinoga e latou te faia ai ni faaiuga o ni feeseeseaiga o le va o tagata ia e ona fanua ia ma e omai e investors ia po o le Malo foi as trustees. Afai o le a aveese lau Afioga i le Fofoga Fetalai le mea leni ae tulai mai ni faaletonu i i le investor po o le Malo lea e tu i le va, o fea o le a fetagisi i ai tagata e ona eleele faale-aganuu lea e fai ai le lisi? I lau tilotilo atu i le mea lea i le Tulafono, o lona uiga e tele ia o vaega e faatino e le tatou Malo i le faiga o le lisi. A o lea o le a toe faamasino foi le Malo i se feeseesega e tulai mai. Pei ona ou fai atu pei o le 80% i le faiga o lisi ia, o le Malo lea o le a tu ai. A sese lava la se mea e fai e le Malo, o fea o le a fetagisi ai tagata e ona a latou eleele faale-aganuu lea ua lisi? Ma le isi mea, pau lea o le atunuu o le

lalolagi ua aveese mai le galuega a le Faamasinoga, a o le sese ma le sao, e na o le Faamasinoga lava e latou te faia mea ia. E pei o le mea lea ua ou tilotilo atu ai i le aveesega o le mea lea.

FOFOGA FETALAI: E faamalulu atu i le sui usufono o Salega Sasae, se i tulai mai le Minisita mo Punaoa Faalenatura ma le Siosiomaga.

Afioga Hon Fiamē Naomi Mataafa (Minisita mo Punaoa Faalenatura ma le Siosiomaga): Lau Afioga i le Fofoga Fetalai o le mea e fia faasao ma le tulaga o le faamalamalama i le tulaga o le mataupu lea ua oo i ai le saunoaga a le sui usufono mai Salega Sasae e faapea ua aveesea mai le malosiaga faaletulafono. Ou te manatu o lea e saunoa le sui usufono i le tulaga lea o le tuuina atu lea i le Faamasinoga Maua-luga Supreme Court, o feeseeseaiga e faasino i lisi. Ma e malamalama lava lau Afioga i le Fofoga Fetalai ma sui usufono mamalu o le Palemene, a tupu se mea faapea, o le Matagaluega leni e ou le Tulafono lea e faafoeina ia lisi, o le isi itutino lea o le Malo. O le Faamasinoga o Fanua ma Suafa, o le isi foi itutino o le Malo, o lea foi e gafa ma fanua ia. A feeseeseai la itutino ia e lua o le Malo, e toe foi la i le Faamasinoga o Fanua ma Suafa, e toe foi la i le Faamasinoga o Fanua ma Suafa e fai e latou le faaiuga? E leai, ona o latou o le isi vaega o le mataupu lea e finau, pe a faapea e tulai mai se feeseeseaiga i itutino ia e lua. O le mea amiotonu, o le ave loa i le isi itutino o le Faamasinoga o le Faamasinoga Maua-luga lea e fai ai le suesuega po o fea e i ai le taatiaga o le amiotonu, e puipuia ai itu uma e lua, o e o lo o agai i le Faamasinoga o Fanua ma Suafa i le tauaveina o latou mataupu ma le tu atu foi o le Matagaluega ia i lana galuega, o le faafoeina o lisi, ua uma ona saunia lelei. Ma e silafia lelei e le sui usufono, so o se lisi, e le mafai lava ona gaoioi pe a le aumaia le pepa mai le Faamasinoga o Fanua ma Suafa ua faamaonia i latou nei e ou le pule. Ae ou te tali atu lava faapitoa, ne'i te'i ua faafofoga mai le atunuu faapea, ua le o toe i ai se Faamasinoga e faia le mea lea. O le aiaiga lea ua i ai e toe teuteu ai le Faamasinoga o Fanua ma Suafa, a tulai mai loa ni feeseeseaiga i luga o lisi, ave loa le mataupu i le Faamasinoga Maua-luga. O le faamalamalamaga lea lau Afioga.

FOFOGA FETALAI: Malo. Ia tulai mai le sui usufono e faaauau le saunoaga.

Tofa OLO FITI AFOA VAAI: Faafetai tele atu lava i le fesoasoani a le Afioga i le Sui Palemia. O lea ou te uua le Tulafono lea o le Alienation Customary Land lea e talanoaina nei, ma o lea e i ai i totonu i i le fuaiupu lea o le aveeseina, e sao, o le aveeseina o le malosiaga faale-Faamasinoga i mea o lisi. Ae maimau la pe ana tuu i ai, aveese mai le Lands and Title Act, ae tuu atu i luga o le Faamasinoga lea ua saunoa i ai le Sui Palemia ave i ai i le Supreme Court, a o le faalavelave la lea, o lea na o le sau lava fullstop loa, oomi ma taofi tu. O lona uiga o lea ua i totonu i i le malosiaga e latou te faia ai e faatino ai le galuega lea a le Faamasinoga.

Anyway, lau Afioga i le Fofoga Fetalai, o se mau lena a leni itumalo.

Afioga Hon Fiamē Naomi Mataafa: O le sui usufono, o se sui usufono ua loa foi i totonu o le Maota, ua sinasina le ao o le sui usufono o Salega Sasae.

O le Tulafono lea e suia, o le Tulafono o le Lands and Titles Ordinance, o lea o le a suia i lalo o aiaiga o le mea lea. O lona uiga la, a fai le suiga lena, e taatia i totonu o le tino o le Lands and Titles Ordinance, ae na o le reference lea e fai i totonu o le Tulafono lea.

FOFOGA FETALAI: Malo faafetai. Ia ua maea foi le saunoaga a le sui usufono mamalu.

Tofa OLO FITI AFOA VAAI: Faafetai. O le a faauma atu lau Afioga i le Fofoga Fetalai. Maimau pe ana tuu i ai le taatia, leaga o le aveese le upu lea. Ia lau Afioga i le Fofoga Fetalai ua faauma atu ia se matou faamatalaga, ma e faamauina lava i lenei taimi le matou tala, (.....) i lenei Tulafono Tau Faaofi, faafetai.

FOFOGA FETALAI: Ia tulai mai le sui usufono mo Palauli le Falefa. E faasao le saunoaga a le sui usufono, lou tetee, ae le o le matou tetee, leaga na o oe lava lea e te saunoa tetee, aveese mai Faamaumauga.

Upu na faatonuina e le Fofoga Fetalai e aveese mai Faamaumauga o le saunoaga a le sui usufono mo Salega Sasae: [e matou te tetee].

Afioga Hon Faumuina Tiatia Faaolatane Liuga (Palauli le Falefa): Lau Afioga i le Fofoga Fetalai....

FOFOGA FETALAI: Palauli le Falefa malie le sui usufono leaga o lea ua uma ona faamau e le Ofisa o le Fono le faagasologa o tatou saunoaga. Saunoa mai lau Afioga i le sui usufono sinia o lena itu o le Maota.

Afioga Hon FAUMUINA TIATIA FAAOLATANE LIUGA: Faafetai i lau Afioga i le Fofoga Fetalai mo le avanoa. O lea foi ua faalogologo atu i saunoaga pau o lenei taeao i le Maota o Samoa. O lenei taeao, o le taeao lava ua faia e le Atua e tatou te felafolafoai ai ma faasoa i mea e manuia ai si o tatou atunuu. O lenei Tulafono Tau Faaofi o se Tulafono ou te faauigaina e au, o se faamanuiaga o tatou tagata. So o se Tulafono lava e fai e teuteu ma toe teuteu, o le faataua a le Malo, ia aua lava ne i i ai ni vaega e ono afaina ai a tatou measina ma faamanuiaga ua foai mai e le Atua mo i tatou. Ua ala ona ou taua ia le vaega lea ona o le a tele ni faamanuiaga e maua mai ai, e 80% o eleele ia e tatou te talanoa i ai, o eleele faale-aganuu. E tulaga ese lava Samoa i tulaga ia, ona e 80% o eleele faale-aganuu ona o le tele o atunuu, a le pulea e se aiga e toatasi eleele, ma o isi atunuu e pulea e le Malo le tele o eleele. Ou te faafetai foi i le avanoa ua taatia atu ai nei i le Komiti o Tulafono Tumau a le Maota le Lipoti o le Pule a le matai Sa'o. Aua afai tatou te faia ma pasia ia Tulafono Tau Faaofi ua faataatia nei i le Maota, o le a mafai ai foi e le Lipoti a le Komiti lea, ona faatulaga lelei mai ai le vaega e faamanuiaina ai (beneficiaries) na pau lava lea o le vaega e tatau ona faamanino, a o le Tulafono Tau Faaofi, e matua lagolagoina. E ala ona ou lagolagoina ona e tasi lenei Tulafono taua a lo tatou atunuu, aua o lea e tatou te naunau ia faatupulaia lo tatou tamaoaiga. Faatupulaia faapefea? Afai ae maua ni pisinisi e faaaogaina o tatou eleele, o le

a faatupulaia galuega. O lona uiga, e oo ina tatou.....ua fai fai ua le lava lo tatou faitauaofai e faia lenei galuega, ia ona tatou o foi lea fai se tatou RSE e omai ai tagata i Samoa nei. Leaga o Samoa, o le atunuu o lea e faataitai i ai atunuu laiti o le lalolagi, aemaise lava le Pasefika.

Lau Afioga i le Fofoga Fetalai, e taua ia o le vaega lea, ina ia tatou iloa ai, e le o laaloa i le silasila a le Palemene, le Malo ma tatou uma, ua tofia ai i tatou e tatou te galulue e atinae Samoa, atinae itu uma ina ia lelei ai. O le mea lava lea e tataua ona tatou naunau i ai, ia faasafua le tamaoaiga. Pei lava foi ona outou faafofoga i taimi e fai ai sou sao i le tatou Palemene, tatou taumafai e taofiofi le omai o tagata i totonu o le taulaga, aua ua amata ona leai ni fanua e faasoa atu e nonofo ai, ua amata ona le lava le suavai, ua faatupulaia. O lea foi sa ou musumususu i le tatou Taitai o le atunuu le Afioga i le Palemia, tatou tilotilo i se polokalame o le de-urbanisation program, ina ia mafai ai ona taofiofi le omai pea omai o tagata mai nuu i tua ma feomia ai le taulaga o Apia.

FOFOGA FETALAI: Malie le sui usufono, se i tulai mai le Sui Palemia.

Afioga Hon Fiamē Naomi Mataafa: Lau Afioga i le Fofoga Fetalai, na ona ou fia faamanatu lava i le sui usufono o lo o saunoa. E ese le taua o lana mataupu lea e aumai o le faatupu o numera o tagata e agai mai i le taulaga po o Apia. Ae po o ua galo i le Afioga i le sui usufono, le Anavatau a le Vaega Faaupufai, O le mea e lelei mo Apia, e lelei foi lea mo nuu i tua, i nuu ma afioaga. Ma o le feau autu o le Anavatau lena, o le momoli atu i tua o auunaga ina ia faapena ona mafai ona afio ma papaa lo tatou atunuu, i o latou nuu ma o latou afioaga. Ae na ona ou toe faamanatu atu i le Afioga i le sui usufono o lo o saunoa.

FOFOGA FETALAI: Ia masalo po o ua faamalamalama atili ai le lautele o le Tulafono.

Afioga Hon FAUMUINA TIATIA FAAOLATANE LIUGA: Faafetai i lau Afioga, faafetai foi i le Afioga i le Tamaitai Minisita po o le Afioga foi i le Sui Palemia.

E ese le faataatia o le anavatau, ese le faatino (implementation), o lea ou te talanoa i le tulaga faatino, e le na o le alaga, alaga, alaga, ae leai se faatinoga. E tasi la lea Tulafono e faatino ai. O lea foi sa i le taimi o le Minisita i le taimi o Minisita o Aoga, sa faasafua ai kolisi i afioaga ma nuu i tua, ona o le faamoemoe lena. O faiga faavae a le HRPP, o le mea e lelei i Apia e tataua foi ona lelei i nuu i tua, tatou te manaomia, faatino a tatou upu ia e fai, ae le na o le fai ia faalogo mai tagata, ae le o faia se mea.

Lau Afioga i le Fofoga Fetalai, e avatu ai lau lagolago i le Tulafono Tau Faaofi. E toatolu matou lea e i le Palemene lenei sa matou amataina le Tulafono lenei, a o laua foi o le Maota. Ia o le Tofa ia Lauofo ma le Afioga ia Alaiasa, o matou ia e toatolu na faia le Tulafono lea, le mamao o le vaai, a o lea foi na matou iloa, e tataua ona toe teuteu. O le mea lea e i ai, o tatou fanua, e matua leai se market value, leai se mea. O le mea foi lea sa ou taumafai ai e fesoasoani i lesi sui usufono na saunoa, e mokesi le lisi. Lisi o le a? Lisi o le fanua Samoa? E leai se market value. Se i vagana ua tuu i ai mea i luga o le fanua, ona i ai lea o le aoga, ona faatoa mafai lea ona i ai le aoga.

O le mea foi lea....

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai....

FOFOGA FETALAI: Malie le sui usufono, se i tulai mai le Afioga i le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: O lea e taua mai ia Minisita ia e tolu, e pau lava le mea, a fai a outou mea fai ia uma, aua le fai faaafaafa. E taua le itu lea sa agai i ai ia o le leai o ni commercial value o fanua, e manaia le itu lea. O le a ou tau atua le mea lea e manaia i la outou faalogologo. E i ai le isi nuu lea ou te matai ai na nofo ai le aiga o le nuu lea ma nofo le latou fanua, o le fanua o le matua taufusi lava, e pei lava e 20eka le tele, ia ona tapena foi lea o le latou lisi i i le MNRE. Ia o atu loa le vaega lea e 20 tausaga, ona o atu loa lea o le vaega lea lisi, amata, amata ona fai le latou atinae, ua totogi mai foi la le lisi. Ona omai loa lea o le aiga lea, ua oo nei ina fono ia le nuu, ona fai mai lea o le aiga, ia avatu le tou vaega lea o le lisi o lo matou aiga, faasoa, o matai uma lava na i ai i ina na fai o latou lafo, ona uma lea ona fai lafo o matai, vavae le vaega a taulelea, ave le vaega a tina o le komiti, ave foi si seleni a le aualuma, ave le tupe i le faifeau. O le aso na sosoo ai, ia ona o atu lea o matafale pe 20 ea, faasoa, faasoa le latou seleni, ia ona fai lea o le latou tonu, ia ave loa le \$10,000 o le latou lisi ave loa si vaega lea e teu \$10,000 e teu ia mo faalavelave fai a lo tatou aiga, ae tatou te toe penei foi i le tausaga fou, o le masina foi lenei e toe totogi mai ai, ma vavae ese foi le mea a le nuu ia ma le faifeau, ma taulelea, komiti, aua o le mea lea e moomia tele le faamalumalu a le faifeau, faamalumalu a alii o le nuu, ia ma iloa ai foi e taulelea i te'i ua o faaleaga ia le atinae. Ia se i vaai i le manaia ia, e maimau pe ana faapea le faiga o lisi foi, o lea e manuia uma ai le nuu, a o le fanua, o le matua taufusi lava e leai se isi aoga.

Lau Afioga i le Fofoga Fetalai, se i vaai i le mea tonu lava lea e lauga mai ai le sui usufono, o lea e implement i i i tatou Tulafono. Ae ana faapea uma lisi, ailoga e i ai se isi faitio, e oo lava i le sui usufono lea o Salega Sasae lea na uma atu nei, na o le faitio, faitio, na tulai mai lava na o le pau lava lea o lana mea, faitio, faitio, pau lava lea o lona sao, faitio, faitio.

Tofa Olo Fiti Afoa Vaai: Lau Afioga i le Fofoga Fetalai, ona o lea ua taua lou igoa e le Afioga i le Palemia....

FOFOGA FETALAI: Masalo, e leai e le na o oe le sui usufono o Salega lea e i ai i i. Malie le sui usufono, e le na o oe le sui usufono o Salega lea e i ai i i.

Tofa Olo Fiti Afoa Vaai: E le o le faitio o le fesoasoani atu i le latou vaivai lea e aumai i i i le latou Tulafono le mea lea na ou tulai atu ai.

FOFOGA FETALAI: Se i tulai mai le sui usufono mo Palauli le Falefa.

Afioga Hon Faumuina Tiatia Faoilatane Liuga: Lau Afioga i le Fofoga Fetalai, o lea na saunoa le Afioga i le Palemia, sa tataua ona fai Tulafono ma

faamaea. Leai o lona sa e silasila i ai, na maea, ae na e vaai foi i ai o le matuai faigofie o le faiga o le Tulafono, leai lava ma se isi na tetee i ai aua foi o le matou te malamalama i le mea lea na matou faia. Na pau lava lea o le mea lea e i ai, o ai e manuia i mea ia. E foliga mai i isi faaupuga, na o le Sa'o. A o le mea lona e manaia ai le Lipoti lea Pule a le Matai Sa'o, e le na o le Sa'o e ona eleele e aofia uma ai le aiga, e tatau foi ona faatulaga/faavae ai se trust account e tuu i ai tupe o le lisi.

O le isi mea lau Afioga i le Fofoga Fetalai, ua taua soo lava le mea lea o le Faavae. O le Faavae o le Tulafono Autu e usitai uma lava ia i Tulafono. E ala ona ou faatau le mea lea, leaga sa ou galue i Faalapotopotoga Faava o Malo, e oo loa i se talanoaga ma se Malo e i ai se Faavae e overrule e le Faavae le Conventions/treaties faava o malo.

Tofa Olo Fiti Afoa Vaai: Lau Afioga i le Fofoga Fetalai, ona o lea ua agai tonu mai lava le saunoaga a le sui usufono i le Faavae sa ou laga. I le taimi lona a o e taumafai le vaega lona, o le manaia ia o le Faavae sa i ai, matuai leai lava ma se teuteuga na i ai seia vagana ua i ai se isi Tulafono a le Malo. O le taimi lona e le i ai ia seia vagana. Malo, malo, malo saunoa.

FOFOGA FETALAI: Na ona faamanatu atu, e le tiutalaloa ia le tatou galuega ma le tatou Fonotaga e i ai le Fofoga Fetalai, e faalagolago le Fofoga Fetalai i le faamalumaluga a sui usufono mamalu o le Palemene. E lelei ona agai mai i i tuu atu avanoa, ia ona malele lea ma saunoa sui usufono mamalu, ia e tuu i ai le tatou galuega. Saunoa ia lau Afioga i le sui usufono.

Afioga Hon FAUMUINA TIATIA FAAOLATANE LIUGA: Faafetai i lau Afioga, ia la ua toe tali lava le sui usufono i lona ia finagalo, ia ae a foi o le tulaga o faamaumauga ia faapea ua faalavelave i lau talanoaga.

O le tulaga lava i le Faavae, e usitai uma Tulafono e oo lava i Tulafono Faava o Malo lea e avea ai tatou ma sui auai. E ifo uma lava Conventions na i le Faavae o se atunuu. O tatou political commitment lea e tatou te commit ai i International Organisations, e ifo uma lava i le tatou Faavae, e oo foi i a tatou Tulafono. E mafai ona overrule e le convention ia tatou Tulafono laiti pe a o i ai ia le interest o le atunuu.

A o le Faavae, e le mafai, le mafai, le mafai, lea e saunoa soo le Afioga i le Palemia, e matua le mafai. E i ai ia atunuu ou te alu atu loa e leai se Faavae o i ai, ae rule loa e mo Administrative Degrees, ia ona ou faaogaina loa lea o le avanoa lona e negotiate ai benefits mo Malo Afaatasi. O se tasi o faataitaiga o Vietnam, ou te alu atu e leai se Faavae, ia la e tele mea e fia faalelei, o mea la na e tatau ona outou silasila i ai.

O le mea lea tatou te talanoa i le lisi, ia e leai se aoga o fanua o lea ua saunoa ia le Taitai o le Malo po o le Palemia, i le tulaga o le leai o se value. O le mea la lea e taumafai i ai tatou, o le a le value o le mokesi, aua e 3 ia parties e lavea ai i i. O tagata e ona le fanua, o le tagata e ona le tupe, ia ma le tagata o lea o le a aoga i ai ia le faiga o nei atinae, a o le Tulafono e matua lagolagoina. O le pule faa-Sa'o e le tatau ona faaogaina i mea ia, e tatau o suli uma o le aiga, pe afai o le a fai se tatou Tulafono Faatonutonu e tatau ona fai se trust account e teu ai tupe nei. E le o fai mai foi le Tulafono, e faamalosi oe ma lou aiga e lisi ni tou fanua leai, it's a choice.

Afioga Fuimaono Teo Samuelu Teo (Falealili Sasae): Lau Afioga i le Fofoga Fetalai....

FOFOGA FETALAI: Ia se i tulai mai ia le sui usufono o Falealili Sasae.

Afioga Fuimaono Teo Samuelu Teo: E le mafai ona tuuloa, leaga e taua ia o le mea ua ou faalogologo atu i ai i le saunoaga a le sui usufono. A mafaufau atu i le saunoaga a le sui usufono se e oso lota mimita, aua foi o Vietnam o se atunuu tele, e leai se Faavae, ua tautaua Samoa, ia aua ana le alu atu le tatou sui e leai se Faavae o Vietnam. O le mea lea, faamalo atu i le sui usufono.

FOFOGA FETALAI: Tulai mai le sui usufono.

Afioga Sulamanaia Fetaiai Tauiliili Tuivasa: Lau Afiogsa i le Fofoga Fetalai e fesoasoani atu foi se i maua foi se malologa a le Afioga i le sui usufono. Ou te fia faafesili atu i le Afioga i le sui usufono, pe le o le Tulafono lenei e lagolagoina ai lau Tulafono lea 2008 lea e pei na saina ai e si Toeaina O Le Ao Mamalu o le Malo i le taimi ua tuanai lenei Faavae? E pei o le fesili lena ona o lea e pei e tuuaina lava lau Tulafono lea sa e i ai i le Minisita i le 2008. E pei o le fesili lea e avatu i lau Afioga.

FOFOGA FETALAI: Ia, ua fai si numi o le Fofoga Fetalai i mea ia, ae malie ia lau Afioga, ia saunoa oe aua e te amanaia ia.

Afioga Hon FAUMUINA TIATIA FAAOLATANE LIUGA: Faafetai. Ia o le faalavelave lea o le fesili o sui usufono e le i foi ia le vaega lea na momoli maia latou, o lea e susu ie o le aualii ia.

FOFOGA FETALAI: Tulai mai le Afioga i le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai, e sili ona ou faasaoina le mea lea. O le Tulafono lea 2008, ua uma ona faamalalama lelei e tatou Loia. E leai lava ma se mea o afaina ai le Tulafono, ia e 100% le Tulafono.

O le faalavelave ua pei uae mafua ai faitioga ia, ona o loia ia e faitioina, e le o i ai le tomai faaloia e lava lo latou poto masani e siaki ai uma lava ia Tulafono ia e aafia, e matua leai lava ma se malamalamaaga. Ae manatua la o lea e talanoa mai loia e aafia ai ma loia o lea sa latou tusia Tulafono ma malamalama lelei. E leai lava se mea o aafia ai fua ma faaletonu ai le Tulafono o le 2008, pau lava mea ia e toe teuteu, o mea e atili ai ona fesoasoani atili le Tulafono i le mea lea e tulai mai soo ai le lē malamalama atoatoa o tagata talu ai ua seetia i mo mea o loia e le malamalama.

Ua ou taua le mea lea, ona o lea ua e taua Le Ao Mamalu O Le Malo. O Le Ao Mamalu o le Malo, a i ai se mea e le malamalama ai, ona fesili loa lea i le Loia Sili pe fesili mai foi ia te au. Ia o au la, i lalo o le Faavae, o au o le Fautua a Le Ao Mamalu O Le Malo, ae le i fesili mai ai Le Ao Mamalu O Le Malo ia te au i le mea lea. Ana fesili mai, semeamanu ou te taua i ai e leai lava se mea o faaletonu o le Tulafono. O le Tulafono ua uma ona silasila totoa i ai ia le Loia Sili aemaise lava o le tulaga foi lele o le tilotilo po o aafia le Faavae. E leai lava

ma se mea o faaletonu, o lea foi la ua saunoa ia le sa Minisita i le taimi lena, ma o ia na avatua i totonu o le Palemene, ia la e sao lelei lava lana faaaliga. Leai lava se mea na afaina ai ia le Tulafono, pei ona ou faasilasilaina, e pei ua seetia ia le... ua taitaiseseina le sa avea ma Ao O Le Malo i le ituaiiga manatu la nei e le faavaea, lea e aumai e le sui usufono lea o Salega, ua seetia ma faavalea e loia ia e fai ia a latou faasalalauga.

O le tele o latou nei, sa ola ae i Niu Sila, e le malamalama i taualumaga o Tulafono a Samoa, e tusia e Loia Samoa. O isi o latou, o lea e matai sa'o o aiga e latou te vaaia lelei fanua Samoa ma aumai foi i totonu i le Kapeneta, o matai Samoa, pe aumai i totonu o le Palemene, o matai Samoa. E leai ma se mea e ela ai le vaai o le Palemene i lena taimi. E silia i le ono masina sa taoto ai le Tulafono lea i totonu o le Palemene. Ia ma ina ua oo ina aumai i le faitauga mulimuli, ia na autasi uma le itu a le Malo ma le Itu Agai e leai ma se isi na faasalaese i le taimi na toe foi mai ai le Tulafono.

Lau Afioga i le Fofoga Fetalai, o le faamalamalamaga atili lena e pei e foliga mai na faaletonu le 2008, e leai lava ma se mea o faaletonu o le Tulafono.

Tofa Olo Fiti Afoa Vaai: Lau Afioga i le Fofoga Fetalai....

FOFOGA FETALAI: Ia malo,, malie le sui usufono, malie le sui usufono. A tapa lau Afioga i le sui usufono mo Palauli le Falefa, malie le sui usufono o lo o faagasolo le tatou galuega.

Afioga Faumuina Asi Pauli Wayne Fong (Itumalo Tu Taulaga Sisifo): Lau Afioga i le Fofoga Fetalai, faamolemole pe maua lava se avanoa e faasao lava le mataupu lea sa aumai e le Afioga i le sui usufono lea.

FOFOGA FETALAI: Leai e le faasaoa e le isi sui usufono le lauga a le isi sui usufono.

Afioga Faumuina Asi Pauli Wayne Fong: E talosaga atu la ia aveese ia le faaupuga lea na aumai o matou e susu ie. Silasila foi lau Afioga, o le afa o le Palemene lena, e fou i totonu o le Palemene, ae atonu e susu, o le afa o le Palemene e susu. Ae talosaga atu i lau Afioga, e lavea ai ma Minisita ma Minisita Lagolago. Pe mafai ona toe faafoi i tua le tala, ia e leai, e alu alu lava mago lau Afioga. E tatalo atu ai ma le agaga faaaloalo.

FOFOGA FETALAI: E faamalulu atu i le paia o le mamalu o le Palemene, e i ai ia mo mea mo lape o lauga. O mea ia e tau e toeaiina o upu foi ia e faakagego mo mea o lape o lauga tatou te toe ai, aua a alu alu le lauga ua mamafa le sausu, ona faakagego loa lea i upu la ia e pei e toe ai. Ia o le maitau lena faale-aumatutua. O le mea la lea e faamalulu atu i sui usufono mamalu o le Palemene, ae faaauau le saunoaga a le sui usufono.

Afioga Hon FAUMUINA TIATIA FAAOLATANE LIUGA: Ia e leai, faafetai i Afioga i Sui Usufono mamalu, leai o le vaega lava lea e pei o le gagana o matou o uso a sui usufono. O lea foi na aumai ia le latou faaeaea, ou te faafetai atu. E sao ia Fuimaono, o le taimi lea sa ou sau talosaga ia Tuilaepa ma Tofilau ina ia puipuia atili au i le faiga o mea ia sa fai i Vietnam, na ou talosaga ai, fai se tatou sootaga faa- Diplomatic ties, ma na fai ai e le Afioga i

le Tootoalii ma le taimi lena o Sui Palemia ia Tuilaepa, le sootaga Faava o Malo a Samoa ma Vietnam. O se tasi o atunuu tau atinae e pei o tatou, ma e tele foi faamanuiaga e maua ai.

Lau Afioga i le Fofoga Fetalai, o lea sa ou taua o le Tulafono, e le o faamalosi ai aiga, e lisi o latou fanua. Leai, o le choice, o opportunities e create e le Malo, e fai ai lau filifiliga pe lisi ou fanua, pe le lisiina. Ia aua o lea ou te tau manatua foi ia le lisi a le Gagaifomauga Nu.3, ia e 600eka, lea foi e alaala mai ia le Afioga i le tama o lena itumalo sa faia foi ia lena tulaga i tulaga faapea, a o faatalitali pea ia le faagasolosologa.

O le isi mea lau Afioga i le Minisita po o le Sui Palemia, o le 20 tausaga, faafou le 20 tausaga, faafou le 20 tausaga, e te iloa e faigata ia i investors, po o tagata e ana tupe ona faaoga e uma ae le 20 tausaga e le i toe recover ina tupe sa faaoga e amata ai se pisinisi. Silasila ane lava i le Tulafono Faatonutonu pe a faapea e faataunuu, tuu atu i luga po o le 50, ia po o se mea faapena, ina ia mafai ai ona tosina mai tagata e i ai seleni po o tupe e fai ai a latou atinae ma atili faamanuiaina ai ia o tatou tagata. Aua o le faamoemoe maualuga lea o le tatou atunuu.

FOFOGA FETALAI: Toe 2 minute o le sui usufono.

Afioga Hon FAUMUINA TIATIA FAAOLATANE LIUGA: Ua ta foi le taimi o le tatou malologa, lau Afioga i le Fofoga Fetalai, faafetai mo le avanoa, manuia tele le tatou Fonotaga.

FOFOGA FETALAI: Malo, o le mea lea e lelei ai le aumatutua sinia, e ese le lagolago i le galuega a le Fofoga Fetalai, faafetai. E le tau laeia lau Afioga o se tasi o sui usufono matua i lena itu o le Maota, faafetai i le manatu mai i le Nofoa ma lana galuega.

Ia ma o le avanoa foi lenei ou te tapa le Afioga i le sui usufono o Vaisigano Nu. 2, e tulai mai o lea lava e maua nai ou minute, le sui usufono mo Vaisigano Nu .2.

Afioga TAPULESATELE MAUTENI TAMASONE METULI II ESERA (Vaisigano Nu.2.): Faafetai. Ma e faafeiloai atu i lau Afioga i le Fofoga Fetalai, avea foi lenei avanoa e faafeiloai atu ai i lena itu o le Maota, lau Afioga i le Taitai o le atunuu, le Sui Palemia, Afioga i Minisita, faapea ia Minisita Lagolago, faapea foi ona faatalofa atu i lea itu o le Maota nei. E faafeiloai atu foi i Faaluuluga o Matagaluega ma Faalapotopotoga, ae tainane le Susuga i le Failautusi ma le Ofisa o le Fono. Ia manuia le faafogafoga mai a Samoa i lenei taeao.

Lau Afioga i le Fofoga Fetalai, ou te tulai atu ma le ava tele e fai sina faamatalaga i lenei Tulafono Tau Faaofi i le Teuteuga mo le Faaliliuina o Fanua Faale-aganuu 2017. O lenei Tulafono Tau Faaofi ua aiaia ai ma Teuteuga o le Tulafono o le Faaliliuina o Fanua Faale-aganuu 1965, ma ou te faapea atu, e lagolagoina e lou nei sui usufono le Tulafono, ae i ai nai vaega laiti ia e fia agai i ai ia se faamatalaga, ina ia toe silasila totoa i ai le tatou Malo.

Lau Afioga o lenei Tulafono Tau Faaofi o Teuteuga o le Tulafono mo le Faaliliuina o Fanua Faale-aganuu 1965, ua maitauina i ia teuteuga, o lo o aofia ai ma le lisiina atoa ai ma le mokesiina o fanua faale-aganuu. O se tulaga lau Afioga e tataua lava ona toe tagai i ai. O lea ua faalogologo foi ma maua i le tele foi o saunoaga a sui usufono, le tele o tulaga sa fia agai i ai se faamatalaga i

lenei foi aso. Ae lau Afioga o nei lava Teuteuga, e faapea atu se faamatalaga i le vaega 3 i lona fuaiupu 19, o lo o faaupu mai faapea o mokesi o lisi o fanua faale-aganuu i le (1b). O lo o faapea mai, afai o le a mokesiina se lisi o se fanua faale-aganuu o le mokesi, e ao ona faamauina i lalo o le Tulafono, o le faamauina o le pule o fanua 2008 po o le RTRA2008.

Lau Afioga, o tulaga ia e i ai le popolega o lenei sui usufono, i le ma lea, o lo o faapea foi ona i ai i le fuaiupu e 22, e faaupu o Tulafono e le faaaogaina (a). O lo o taua ai le lē faaaogaina o le Tulafono o le faamauina o pule o fanua 2008. I le Tulafono lava lenei lau Afioga o lo o agai i ai se popolega o lenei sui usufono.

Lau Afioga i le Fofoga Fetalai e i ai i ia faaupuga po o ia fuaiupu o le Tulafono, o le Faamauina o Pule o Fanua 2008, ona o le Tulafono lenei o lo o faaaogaina ai le Torrens System mo le resitalaina ma le faamauina o pule o fanua faale-aganuu. Sa maua lau Afioga i le aso ua tuanai se tasi o finagalo i le tulaga lava lea, ona o popolega lava, afai ua leva ona tatou faatinoina le lisiina o tatou fanua lea ua i ai le fuafuaga, ona o le tulaga lava o le tau atinaeina o le tamaoaiga o lo tatou aiga. Ma e i ai foi le talitonuga, o le Maota nei, e leai lava se isi e le i ai le finagalo i le tulaga, atinae o tatou eleele faale-aganuu, atiae o tatou aiga, o tatou tagata, ma o tatou itumalo. Ae e i ai lava le popolega lea i lou nei sui usufono, ona o tulaga faigata ma tulaga ogaoga i lau maitau i le mea lea o le Torren System.

Lau Afioga i le Fofoga Fetalai, e i ai le tulaga foi lea e pei lava ona....

FOFOGA FETALAI: Malie le sui usufono mo Vaisigano Nu.2, se i tulai mai le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Saillele Malielegaoi: Lau Afioga i le Fofoga Fetalai, o le mea e fia faasao. O le matau lea e matau atu i le saunoaga a le sui usufono, pei o lo o fenumiai ia te ia le Torren System. Ou te manatu foi ua leva ona faasalalauina le mataupu lenei o le Torren System, o le vaega lea e lesitalaina ai ia eleele, o le a ou faaigoaina ina ia malamalama, eleele tau papalagi, e agai tonu lava i ai le Torren System ma o eleele tau papalagi. Ua ala ona faaaoga le vaega lea, ona o le faigata ona toe mulimuli i le faiga tuai o le tusia o pepa e faamaonia ai o oe o le pule o le fanua e umia le fanua papalagi lea. O le tele o faatauga fanua, e sue atu ua leiloa pepa, pe na o matua fai ai ni a latou nonogatupe, sue atu i le faletupe sa fai ai e le o maua ai, ona taofia ai lea o le tele o nei faatauga fanua ua le mafai ona faatino ona ua leai ni pepa o fanua po o Deeds e faailoa ai ia le tagata e ana moni ia le fanua palagi, na o fanua palagi lava e agai i ai. Ia o le a le mea e mafai o lea ua mamulu le tupe i o i le tagata e ana le fanua, e fai atu le loia e aumai pepa o le a....ia ae leai ni pepa. O le faiga la lenei, o lea ua o uma ai lava faatauga fanua i Niu Sila, Ausetalia ma tatou ua faaaoga le lesitala, ua le toe faaaoga ia Deeds. I le faatalanoaina o le mea lea, o le saunoaga a le tatou Faamasino Sili, manaia tele le vaega lea o le lesitala o latou ia e ana ia fanua umia saoloto, ae faaaoga loa e fai ai faamaumau ai loa ia mea nei o tuaoi o fanua faale-aganuu. O faaiuga ia a le Matagaluega o Fanua ma Suafa i a latou Faamasinoga, talu ai le faaletonu tele o Record Systems tuai, sa tele ina femisaai ai aiga. Ma o nei foi feeseeseaiga, e maumau ai ola o tagata. O le isi faasinoga tuaoi, o lea e talanoa mai ia le toeaina i tua, fai mai, o le matou tuaoi e sau mai le laau le kava e tau i o i le filimoto. O lea la e tau fesili le sui o le tatou ofisa, o fea la o i ai le kava

ae o fea o i ai le...? Ae faalogo atu ua pau, ae tilotilo atu i tua, ua palasi le tino ua leai se ulu. Tulou lava. Ua tipi mai e le isi tagata mai tua i le sapelu, tulou lava le Maota. Ua tele faalavelave faapena. O au foi ua tele mau Faamasinoga o le matou foi aiga, ua ou alu ai ma matamata i le faasinoga o mea nei o tuaoi, ia ou te alu la ou te le tu pei o le tu a le tagata la e tu mai i o ma faasagasaga mai i tagata ia, e te'i ua tupu se mea faapena, ua tele faalavelave e tutupu ai. O le finagalo la o le Faamasino Sili, manaia tele pe a faaoga loa le mea lea lesitala lea a le Matagaluega e tau ina avea o se faamaumauga ina ia mau ai ia faaiuga a le Faamasinoga o Fanua ma Suafa. O lea la na faaoga ai le tulaga lena mo faamaumauga o iuga o Fanua ma Suafa i le faasinoga o tuaoi o fanua faale-aganuu. Ae a oo loa i mea tau faatauga fanua palagi, na o le pau lava lea o le mea e apply i ai, ae vagana la mea o fanua faale-aganuu, na o le pau lava le mea o le faamau lelei o tuaoi ia o eleele faale-aganuu e faaoga i ai faiga faaneionapo, o le lē toe faaogaina loa mea o tuaoi ia masani a tatou, ae faaoga loa pine o fanua e matua tutui i lalo, ia faigofie ona maua ai ia tuaoi. Ia o le uiga lena o le Torren System. E oo mai nei, o lea e aumai le malamalama le Torren System ae o lo o manino lelei le faaogaina o le Torren System faaoga mo le faamauina o le evidence o le e ana le fanua ua tusia i totonu o le lesitala a le Malo. Ae a oo loa i fanua faale-aganuu, o le faasinomaga mo tuaoi o fanua faale-aganuu.

Lau Afioga i le Fofoga Fetalai, ou te le iloa po o le a se isi faamaninoga, ua ou faamaninoga foi faafia lenei mataupu i luga o le Televisi faapea foi ma nusipepa. Sa ou faapea o le sui usufono o le HRPP e atamai, e vaai i ai i mea ia ma tauave, ae le o le mulimuli pogisa i mataupu ia o lo o aumai pea e i latou o loia, ma ua fai soo foi le fesili, o i ai se fanua faale-aganuu ua aveesea? Ia o le tali e leai, e leai lava ma se fanua faale-aganuu. E ala ona ou fai atu, se ia outou alolofa, e tasi lava le loia e faalogo i ai Samoa i lalo o le Faavae, o le Loia Sili. I lalo ifo o le Loia Sili, o lea e i ai le anoano o loia o tamalii ia Samoa, o alii ma tamaitai, o isi o fanua a tamalii o Samoa. O lea e lagolago uma i le agaga lea e tasi o lea e aumai foi Tulafono, o lea e soalaupule e matai Samoa o latou e pulea fanua faale-aganuu.

Lau Afioga i le Fofoga Fetalai, pei e i ai pea le doubt, le masalosalo e le pule tatou i o tatou fanua. Lau Afioga i le Fofoga Fetalai, se aveese lena mea o lena e limataitaiseseina outou e le Salega lea e toatasi.

FOFOGA FETALAI: Malo faafetai. E faamalie atu i le sui usufono mo Vaisigano Nu.2, se i fai atu lava le fautuaga lea a le Nofoa. Leai e le faatonuina ae na o se fautuaga i le agaga faaloalo, leaga o tatou Tulafono Tumau, o lea e matou te taumafai e mulimulitaia i a tatou galuega, leaga e i ai a tatou Tulafono Tumau so o se mataupu lava e laga i se tulaga foi lea e sui usufono ae ua maea ona faamalamalama, ae ua avea o se mataupu foi lea e fai ai se faafinauga ae ua uma ona laga e le isi sui usufono, toe laga e le isi sui usufono, toe laga e le isi sui usufono, toe laga e le isi sui usufono, ae ua i ai le faamalamalama a le Malo, ae fai mai le Tulafono e tatau ona tilotilo i ai le Nofoa ina ia tuuitia ai le tulaga o le tatou taimi, e maumau i le tulaga o lo o i ai. Aua afai o lea ua saunoa faamalamalama le Malo ae toe tulai mai sui usufono e toano e laga le mataupu e tasi, e toe tulai atu foi le Malo e toe faamalamalama faaono le mataupu lenei. Ia a o le mataupu foi lenei, ia ua maea foi ona fai i ai le tatou faamalamalama na auala mai ia i latou sa faapena ona tusia ma auala mai lenei Tulafono i le Palemene.

E ui i lea, ina ne i faitauina ai le Nofoa matou te apo ia le finagalo o le Malo ae tiutalaleu i le finagalo o sui usufono mamalu, e leai, a o le galuega ina ia faapena ona tuuaititia taimi e alu ai i le tasi le faamalamalama, ae faapena ona tulai mai sui usufono e toe faamalamalama ma faamalamalama. Ae ui i lea, e faalagolago le Nofoa i a outou Afioga i sui usufono mamalu ina ia faapena ona....e lelei foi i le faafofoga mai o itumalo, se o le tatou sui usufono e le tau faamalamalama o la ua malamalama le mea lea na saunoa mai ai le Malo. O le matou fesoasoani atu lea.

Ona o lea ua tatou taunuu i le tatou malologa masani, o le a faataatiaese Galuega a le Fono mo lana malologa masani.

Na faataatiaese felafolafogaiga a le Fono Aoao i le itula e 10.48 i le taeao ma toe faaauau i le itula e 11:30 i le taeao.

FOFOGA FETALAI: Ou te faasilasila atu ua toe amatalia Tualumaga ma Galuega a le Fono Aoao Faitulafono.

E i ai le manatu ua faapoopoina foi le malosi o le Afioga i le Palemia ma le Sui Palemia, faapea foi le Kapeneta, aemaise foi o le mamalu o taitai o le atunuu e faaauau ai le tatou galuega.

E faia le tatou malologa o saunoa le sui usufono mamalu o Vaisigano Nu.2. Ou te tapa le sui usufono mamalu e tulai mai e faaauau le saunoaga, see ese mai le mataupu o lea ua saunoa i ai le faamalamalama a le Malo. O le fautuaga lea, tulai mai le sui usufono.

Afioga TAPULESATELE MAUTENI TAMASOME METULI II ESERA: Faafetai atu i lau Afioga i le Fofoga Fetalai, ua matu i fau le taumafataga i lenei aoauli, ua sao i alo foi se taumafaiga a le ofisa nei aua sa outou faasiliga malosi.

Lau Afioga i le Fofoga Fetalai, pei ona avatu le manatu e faataatia atu le tulaga e i ai lenei sui usufono, sa manino ona faailoa atu le lagolagoina o le Tulafono. Lau Afioga i le Fofoga Fetalai, sa manino foi ona faailoa atu nai vaega ia e fia fai i ai se faamatalaga, pei lava ona taumafai atu.

O lea ua mauiua lava e le fono nei finagalo uma o lo o i ai ia le Palemene e tatou te agai lava i le lagolagoina o lea Tulafono. Ae peitai ane, e i ai lava ia avanoa foi faasui usufono i so o se fonotaga lava, e mafai ai ona faaleo ai ia ni popolega ni atugaluga po o ni fautuaga, pei o le tulaga lea sa i ai....

Lau Afioga i le Fofoga Fetalai e puupuu lava le....

FOFOGA FETALAI: Ou te faamalulu atu i le sui usufono mamalu, malie le sui usufono mamalu, ou te tau fesoasoani atu leaga e aafia ai le Nofoa i lana tausiga i le tatou galuega, ne i tuuaina faapea o so matou taumafai e taofiofi avanoa ma saunoaga a sui usufono mamalu. A o tatou Tulafono Tumau, o lo o manino lava ma malamalama le faapea mai; o le taua soo o se mataupu, ua i ai se faamalamalama a le Malo, a o lea mataupu e aveai ai o se faafinauga, o le tiute o le Fofoga Fetalai o le faamuta o le saunoaga. Ae manino, o le ala foi lena afai... e pei lava foi ona ou avatu, a faapea e saunoa sui usufono e toalua i le amataga aumai le tulaga lea, saunoa foi isi sui usufono e toasefuluvalu aumai lava le mataupu lea, o lona uiga, ua 20 ai faamalamalama a le Malo. E

manatu foi le Fofoga Fetalai e tatau ona faagaioi galuega a le tatou Maota Fono, aua foi o Tulafono Tau Faaofi nei, e tele ina tuuina atu i tulaga foi nei o Komiti, ona maua ai foi lea o avanoa o sui usufono mamalu e afifio atu i ai e toe faaali foi outou finagalo ma toe tuuina mai i le tulaga o le tatou galuega. Ae pei o avnaoa ia, e le na o le pau lea o le avanoa o le sui usufono e faapea na o le faitauga faalua, ae faamanatu atu le itu lea, leaga o tatou Tulafono Tumau. Malie le sui usufono leaga o le faafofogaaga a Samoa e tatau foi ona ou polapuipui au i le Nofoa ae malie e faaauau le saunoaga e le o toe tele foi se minute.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai, masalo o le isi lea vaega o le Tulafono Tumau e le o malamalama i ai le sui usufono, a saunoa loa lau Afioga ona alaala lea i lalo, o lea la ua alaala i lalo.

O le mea lea ou te fia tulai atu ai, ina ia silafia foi le isi vaega lea o Taulumaga a le Palemene. O le Malo e avatu ai le upu faaii. O le a lava se finauga e fai, o le Malo lava e avatua le upu faaii. O lona uiga o lea mea, afai e fetogia se mataupu i totonu e le sui usufono ma se isi o le Kapeneta nei, e oo i le faaselau ona tulai mai, e faaselau ma le tasi ona tulai atu le Malo. Po o le faaape ona tu mai, e faaape ma le tasi le Malo. O le final say o le Malo. O le upu faaii lava o le Malo, ina ia silafia ai e le Maota lenei, pe afai e maumauai le manatu o le Malo e le o atoatoa le tulai mai o le sui usufono, e le mafai foi ona nofonofo le Malo, leaga o lea e alu i tua a tatou faasalalauga. A na faapea e le o alu i tua faasalalauga a o lea e gata ai lava iinei, ona faatoa tuu atu lava lea e le Malo e tafilisaunoa sui usufono o lo o sausaunoa. Ae talu ai ona o lea e alu i tua, leaga o lea e faafogafoga mai le atunuu, e tatau ona malamalama le atunuu po o fea le sao. O le ala la lenei e le mafai ona tuu avanoa le Malo i se mataupu e finau ai, o le upu faaii lava le Malo mo le silafia e le tatou Maota nei.

FOFOGA FETALAI: Malo faafetai. Tulai mai le sui usufono e faamaea mai le saunoaga.

Afioga TAPULESATELE MAUTENI TAMASONE METULI II ESERA: Lau Afioga i le Fofoga Fetalai, o lea ua saunoa le Afioga i le Palemia, le Taitai o le atunuu, e faimea faalogo lenei foi sui usufono i tulaga e pei ona taumafai lau Afioga i le Fofoga Fetalai e faailoa mai o le tulaga o tatou Fonotaga. Ona i ai lea o le manatu, ia, o lenei ua e saunoa e i ai foi le isi taimi e faaauau ai se faamatalaga. Faamalo faafetai mo le avanoa ua maua, ia manuia le Fono, manuia tele le tapuaiga a nai ou nuu i Papa, Vaivaimuli ma Fagasa.

FOFOGA FETALAI: Malo faafetai. Ia, tulai maia le sui usufono mo Falealili Sisifo.

Tofa AUMUA ISAIA LAMEKO (Falealili Sisifo): Lau Afioga i le Fofoga Fetalai, e momoli atu le agaga faafetai ua maua le avanoa i lenei itula o le taeao e fai ai foi se manatu o le itumalo e tusa ai ma lenei Tulafono Tau Faaofi toe teuteu. Atonu o le aotelega lava o le Tulafono Tau Faaofi, o lenei ua opea i lumamea, ma tulaga o le faamalasia, laiseneina o fanua faale-aganuu ina ia faafaigofie le mokesiina o lisi.

E momoli lau faafetai i le Afioga i le Tamaitai Minisita e tusa ai ma lenei Tulafono Tau Faaofi, ona o au se tasi o sui usufono e laga lava le mataupu lenei e faatatau lea i le faasalalauina o lisi. O lea ua aumai le Tulafono Tau Faaofi ua aumai ai le vaega e faasalalau ai so o se ituaiga lisi i fanua tau Samoa i le umi e oo atu i le ono masina. Ua ave foi le pule faataga i le Ofisa Sili o Pulega o le Matagaluega o Siosiomaga e faaopoopo ai nisi masina pe a silafia e le o mafai ona ausia ina ia maua uma e tagata e i ai o latou agavaa i fanua tau Samoa ina ia mafai ona aumai ni a latou tusitusiga e faatatau i lea fanua, ae le i faia le lisi.

Ma le isi vaega e fai ai sau faamatalaga, o le mataupu lava lenei o le mokesi. Aua o le faataitaiga afai o au o le matai o le matou aiga e i ai o matou fanua tau Samoa, lea la ua fia lisiina, e mafai la ona ou alu au e saili mai tagata o le matou aiga, o suli ma feoi e tau i le fanua lea e faasalalau le lisi. Ae ala ona tupu le vevesi, ona ua saina fua e i latou e i ai le agavaa le lisi lea e fai ai le mokesi. Afai ua manao le o lo o lisiina le fanua tau Samoa e faaoga le fanua lea ua lisiina mai e fai ai se mokesi, e tataua lava ona ia sailia muamua se finagalo autasi tusitusia, written consent mai le e ona ia le fanua, o le fanua lea o le a faaoga e mokesi ai lana nogatupe i le faletupe. I lou la manatu, o lenei finagalo autasi tusitusia, e mafai ona avea o se vaega o le feagaiga o le lisi i le va o le onaina le fanua tau Samoa lea ua lisi mai le tagata lea ua ia lisiina. O le mokesi la i lou talitonuga, e i le va o le na lisiina le fanua tau Samoa ma le faletupe. E le saina e le onaina le fanua tau Samoa se vaega o le talosaga i le Bank. O le tagata lea na te lisiina le fanua tau Samoa, o lana matafaioi muamua o le totogiina lea o le tau o le lisiina lea o le fanua tau Samoa i aiaiga ma tuutuuga i le feagaiga o le lisi. O lou lea manatu. E momoli ai lau faafetai i le Malo e tusa ai ma lenei Tulafono Tau Faaofi, ina ia faigofie ai ona faamauiina le tulaga o le mokesiina o fanua tau Samoa. E avatu ai le lagolago a le itumalo o Falealili Sisifo i lenei Tulafono Tau Faaofi. Faafetai.

FOFOGA FETALAI: Malo faafetai. Ou te tapa le sui usufono mo Falealili Sasae.

Afioga FUIMAONO TEO SAMUELU TEO: Faafetai i lau Afioga i le Fofoga Fetalai. Ou te manatu o lea ua maea palegaauau foi le tautega ma le taligasua i le mamalu o le Palemene aemaise o le Afioga i le Palemia, le mamalu i le Kapeneta ma sui usufono. O le aoga lea o le sosoo o Nofoa o Falealili aua e avatu e le isi sui usufono le isi vaega, ona faauma atu lea e au. E puupuu foi o maua lagona aua e fealofani lava Falealili Sasae ma Sisifo. Ou te manatu lau Afioga i le Minisita o lea ua uma ona lalagi le u ma faafuata lou tao aua le Tulafono Tau Faaofi. Ua uma ona fai le ma pitolaau o le faamanino o le ma itumalo. E leai lava se toeaina e le o malamalama, ua manino uma Falealili na pau le mea fai mai, ia o e faaleo, e lagolago Falealili i le Tulafono Tau Faaofi ma avatu ai ma le tuualalo, ia na o le lua tuualalo. Aua foi ne i tee le uluga i lau Afioga i le Tamaitai Minisita, e tau faafefefefe le lagona e avatu ni tuualalo pe tau sai mai i le tele o nai tuualalo e avatu.

O le tuualalo muamua, o le vaega foi lea i le taimi ua lapse ai le lisi po ua faaletonu le tagata e lisi. Afai ua fitu tausaga ae faaletonu le lisi ae 20 tausaga o lo o saina, le va la lea, pe mafai ai e le aiga, le sao ma lona auaiga a o talia e le Malo se isi e toe faaauuina ona galueaiina le fanua lea pe leai. O lea ua uma ona ave le tali ou te iloa o lena ua i totonu o le faamalalamamaga o le Tulafono

Tau Faaofi, e lelei lava le faafofoga mai o si ou itumalo i nai toeiina ne i te i ua le talitonu tele i lau tala.

A o le lona lua o tuualalo, se faamolemole, i le tulaga foi lele ina ia matua faamanino ina ia iloa e sao o aiga ma auaiiga, e mafai ona latou faia le latou lisi, ona resitalaina lea o le lisi i lalo o lo latou aiga, po o se isi i totonu o le auaiiga ua malilie i ai ona omai lea e mokesi i le Bank, i lo le tau faatalitali i se foreign investor e o atu e fai se pisinisi i luga o le fanua. A ia tuu le aiataua lea po o le privilege lea i le sao ma le auaiiga e omai latou fai le latou lisi ona ave lea i le Bank e nono mai le tupe e fai ai le atinae. O lona uiga, e penefiti le aiga lea e le gata ua uunaia e faia galuega, siitia le tamaoaiga, a o la e foi ua mafai ona latou galulue ai instead i lo le ave i tagata foi nei tatou te faatalitali i kamupani ma aufaipisinisi ma milionea mai fafo, aua e oo lava i milionea o lea e omai faaoga tatou tupe. Ae tuu la le avanoa lea i o tatou tagata e galueaiina ai le lisi lea ma le latou foi tamaoaiga.

Ou te faanoanoa e faalogologo atu fai mai e leai ni value o tatou fanua Samoa. Oi a leai ni value o la e i ai value? E value mea la e i luga o le eleele, e oo lava i le palapala o maa ma laau ma mea uma, e i ai tau. O le ala foi lena o le omai o tagata nei e fia mananao e lisi o tatou fanua.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai...

FOFOGA FETALAI: Malie le sui usufono mo Falealili se i saunoa le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Leaga e taua le vaega lea. O le uiga o le upu o le value, e faasino i le faatau. E mafai ona faatau le fanua, e leai. O i ina la e mafua ai le upu lena. O mea o fanua foi nei e mafai ona faatau, aua a e fesili i ai i le tagata, e fia le tau o lou fanua, e vaai po o le a le tau lea ua i ai i le maketi. Afai lava o lea na faatau fanua taulalata atu e \$200,000 i le kuata eka, ia, o le market value lena o le \$200,000 le value. Ona fesili lea, e faapefea le market value o le... E faasino i le market value pe fia le tau e faatau ai, e leai se value. Aua foi e leai se isi e fia faatauina se fanua Samoa aua e sa. O le uiga tonu lena o le upu, e leai se market value, e leai ma se isi e fia faatau. O le uiga lena o le upu e faasino i fanua.

FOFOGA FETALAI: Ia, masalo o lea ua manino le vala lea.

Susuga Hon Laauli Leuatea Polataivao Fossie Schmidt (Gagaifomauga Nu.3): Lau Afioga i le Fofoga Fetalai, na o sina avanoa lava o se mataupu e fia faamalalama.

FOFOGA FETALAI: I le saunoaga a...

Susuga Hon Laauli Leuatea Polataivao Fossie Schmidt: I le saunoaga a le sui usufono mamalu o lea ua oo i mea tau value faamolemole.

FOFOGA FETALAI: Oi o le sui usufono mo Falealili?

Susuga Hon Laauli Leuatea Polataivao Fossie Schmidt: O le sui usufono mo Falealili. O se mea fia faamalamalama. Sa nofonofono lava ma le manatu e fia laga se leo ona o le saunoaga a le Afioga i le sui usufono mo Palauli le Falefa analeila... lea sa saunoa faamalamalama....

FOFOGA FETALAI: Leai la. Malie lau Afioga, leaga e le aumaia le saunoaga a Faumui ma le saunoaga faamalamalama a le Palemia i le faauilavea ia Falealili e fai ma mea e create ai sou finagalo e faaali sou finagalo. Vagana o sau mea e fia faamalamalama ma se mea e fia faasao i le saunoaga a Falealili ona faatoa mafai lea i a tatou Tulafono Tumau.

Susuga Hon Laauli Leuatea Polataivao Fossie Schmidt: O lea ou te agai tonu lava i le sui usufono mo Falealili i le mea lea na saunoa i ai i le value faamolemole lau Afioga.

FOFOGA FETALAI: Ia se i faapuupuu mai faamolemole lau Afioga.

Susuga Hon Laauli Leuatea Polataivao Fossie Schmidt: Ia o matou fanua ia na lisi pei ona saunoa e leai se value lau Afioga, ou te tautino atu, e i ai value. O le matou value na fai i le fanua lea e lisi nei pei ona saunoa le sui usufono, o le tau lava o lea e lisi ai le fanua i le tausaga, e \$300 i le eka, 600 eka faatele, o le value lena sa matou fai feagaiga ai ma le investor lea na sau. O le tau lena o lea na matou ave i le investor e fesoasoani. E faapena foi la le isi lisi lea lau Afioga i le 500 eka o le tau foi lena na matou... i le matou lava feagaiga na fai.

FOFOGA FETALAI: Ia, o lea la se i tulai atu le Palemia.

Susuga Hon Tuilaepa Auelua Fatialofa Lupesoliai Lolofietele Neiote Aiono Galumalemana Dr. Sailele Malielegaoi: Lau Afioga i le Fofoga Fetalai, e manino lava le faamalamalamaga, tatou te le o talanoa i ni lisi, o lea tatou te talanoa i le market value, o le value o le fanua e faatau ai. O lea lava tatou te iloa e le mafai ona faatauina le fanua, ae mafai ona faatau le lisi... E i ai la le value o le lisi ae o le fanua lava ia i le tulaga o le market value, o lea e talanoa pe a oo i le taimi e faatau motu ai. E matua leai lava ma se market value o fanua tau Samoa. O le ala lena na nofo ai le vaega lea a le Lands ma tau fuafua sina value o le elelee e fua i ai le lisi, o elelee ia po o elelee o le a faaogaga e le Malo i ana fuafuaga, ona tau fua lea o sina tulaga faapena. O le ala foi lena sa matou feiloai ai ma Salelologa i le elelee lea na ave e le Malo, o le upu lena a au na ave i ai, e leai lava ma se value o fanua nei. O le uiga o le upu e leai lava ma se isi e fia faatau. Ae o le mea lea o fefaatauaiga, o i ina e fix ai le value. A o lea la tatou te talanoa i le lisi, e ese mamao lava le mea lea na ou talanoa atu ai, o lea foi na laga mai e le sui usufono mo Palauli le Falefa, ese le lisi. E tele le value o le lisi, ae a oo loa ina manao le Malo e talanoa ma le nuu i se atinae, ona taumafai lea o le Malo e fai sina value foi lele, e ave ma toeaiina o le nuu e faatatau i le fanua lea. E faapitoa ona e le mafai ona faaogaina le market value o fanua, aua e na o fanua umia saoloto e i ai le market value. Ae matua leai lava se market value o mea tau elelee faaleaganuu.

FOFOGA FETALAI: E masalo o lea ua manino. Malie le sui usufono e pei ona tau tulai mai, e i ai vala o mataupu ia. O lo o manino foi, e tofu lava tatou ma le faamaninoga ma le agaga o lea ua malamalama ina ua toe malele foi ma saunoa le Afioga i le Palemia. O lea foi na saunoa le Palemia e toatele lauia sa latou faia lea Tulafono ma taumafai e tuufaatasi finagalo ina ia maua le agaga lea. E le faapea e fai tala tuulafoai i o tatou ia finagalo aua e tasi lava le pito o lea tatou te manatu i ai ia maua se tatou tupe ma atinae aiga ma eleele. Ae o lauia sa feagai ma, e tilotilo lava i tulimanu uma. E fai foi o le tagata e ana le fanua lea laa lisi, a o le tagata foi e sau e lisiina le fanua ia maua foi sana faasiliga.

E pei o itu lena, ae malie e leai se finauga e fai, leaga e le mafai e le tatou Tulafono Tumau ona talatala le tulaga lea. So o se lauga lava, e faapena ona avea e faatupulaia ai se finauga e mafua mai i le lauga, ae o se finauga e faapena ona mulimulitaia e isi sui usufono, ona o lona uiga o le a tatou o lava na o le faamalalama ma finauga, e leai la se tatou mea e maua ai. O la e foi e faafofoga mai le atunuu, o le a le latou mea o le a maua i le tatou finau?

Susuga Hon Laauli Leuatea Polataivao Fossie Schmidt: Lau Afioga i le Fofoga Fetalai....

FOFOGA FETALAI: Malie le sui usufono, leaga a ou tuu atua le avanoa e toe tuu foi le avanoa i le Palemia.

Susuga Hon Laauli Leuatea Polataivao Fossie Schmidt: E pau lava lea o se mea, ou te le o finau, e le o se finauga lau Afioga. Na o le faamalalama lava o le saunoaga a le Palemia, o le faapoopoga o le value o le lisi. E pau lea o le mea sa ou tulai atu ai.

FOFOGA FETALAI: O lea ua ou manino. O lea e ala ona fai le tau, leaga o lena o le a lisi.

Susuga Hon Laauli Leuatea Polataivao Fossie Schmidt: O le mea lena o lea sa ou taumafai atu i ai.

FOFOGA FETALAI: A taatia lava le fanua ia e leai se tau, aua o le fanua tau Samoa.

Susuga Hon Laauli Leuatea Polataivao Fossie Schmidt: Ia o le mea lena sa ou taumafai atu ai. O le a foi foi se manatu o lenei itumalo.

FOFOGA FETALAI: Aua e fai le tau o le fanua tau Palagi aua e mafai ona e toe faataua taeao. O le tulaga lena, e tofu lava tatou ma fanua tau Palagi, tofu tatou ma fanua tau Samoa tatou te iloa le mea la e tupu ai. Ae faamalulu atu.

Tulai mai le sui usufono mo Falealili e saunoa, faai mai loa le saunoaga.

Afioga FUIMAONO TEO SAMUELU TEO: Faafetai i lau Afioga i le Fofoga Fetalai, o lea ua faamaea mai lou taimi. Ae momoli atu le faafetai tele, ne i te i ua vavao i le value, i le taua fua o le value, ae o lea ou te talanoa au i le value o le lisi lea tatou te talanoa ai, aua o lea o le a ave le fanua e mokesi. Ae ou te le talanoa la au i le market value, ae ui i lea, taatia ia value e pule

outou a o le lisiina o fanua, o lea ua avatu le tuualalo i le Afioga i le Tamaitai Minisita, toe silasila ane lava i se avanoa ina ia mafai ona omai ai lava ma savalivali mai le sao o le aiga ma nai ona aiga, fai lelei le latou lisi ma faamatuu atu ai loa e ave i le Bank e avatu le nonogatupe e faatino ai atinae ma saga manuia ai lava Samoa.

Manuia lau Afioga i le Fofoga Fetalai, o le pao ma le vavao o le Maota, ia maua foi lou onosai e te lava onosaia ai finagalo faigata o le Palemene. Ia manuia lau Afioga i le Palemia, aemaise Minisita ma o outou lagolago, ae ola foi lenei Itu Agai, i le suafa o Iesu. Amene.

FOFOGA FETALAI: Malo faafetai. Ia, e leai e tau faapena e faamalulu atu foi i sui usufono ma le Maota i se taumafaiga foi a le Nofoa ina ia mafai ona..... se ta te musu e fautuaina ona e i ai le upu foi lele, e le fautuaina e le matapia le manaia. Ae lafo atu o la tatou galuega e fai i luga o le agaga foi lenei, e fai fuafua foi i le tulaga o le tulai soo atu o le Malo e faamalamalama atu le pitolaau lava lea e tasi o lo o faapena ona apo mai i saunoaga a sui usufono mamalu. E ui i lea e sa i le Fofoga Fetalai, ona faapena ona faataumatatao i se finagalo o se sui usufono mamalu leaga o outou o taitai o le atunuu, o lupe na faia mai le fuifui.

Ia, ua oo mai le faasologa i le sui usufono mamalu mo le Itumalo Tu Taulaga i Sisifo.

Afioga FAUMUINA ASI PAULI WAYNE FONG: Faafetai atu i lau Afioga i le Fofoga Fetalai. E le umi foi se manatu. O le tuualalo lava ia lea e taumafai atu ai lenei itumalo, o lenei ua i ina le poto foi ma le atamai, aua le tulaga o i ai a tatou fanua faale-aganuu. Ae o le tatalo, o le taimi nei e 80% i le 20% lea ua i ai, e pei o faamaumauga ia o lea o lo o aumai e uiga i fanua tau Samoa ma fanua umia saoloto. E tatalo i le Afioga i le Minisita, tumau ai i le 80% lenei. Ia uma atu le Tulafono Tau Faaofi lenei ma se isi Tulafono o tumau lava i le 80% a tatou fanua. Silasila foi lau Afioga, ina ua foafoa e le Atua ia Samoa ma foai mai ona eleele, e 100% sa i ai, na aumai lava Samoa aumai ma ona eleele e 100%, omai loa Papalagi, Siamani ma isi tagata na o mai mulimuli, o latou la ia o lea sa faia le amio lea i le 20%. O lea la ua i ai Samoa i le taimi lenei. A silasila lau Afioga i land claims ia i le Ofisa, e matautia. E matautia mea sa ave ai o tatou fanua i na vaitaimi. Ioe, e ma foi e faalau atu, ona o le a? Ona o le mativa i na vaitaimi lau Afioga. O lea la ua alu ai le isi 20%, o lea ua toe faafoi i le Malo isi fanua, ae o lea e tumau lava le 80 lea lau Afioga i le Fofoga Fetalai. O lea la e tatalo atu ai, e ese faafitauli i le taimi lenei ese faafitauli i le taimi lenei. O le faafitauli i le taimi lenei, o le vaivai o toeaia sa i ai sa o latou foaia ai o tatou fanua. A o le taimi lenei o lea ua i ai le isi faafitauli fou, ua i ai foi ma le poto fou o lo o aumai ai aua le toe aveina o fanua nei. Ae ua sui foi la, ua le toe omai Siamani ma Papalagi o lea ua i ai, (.....)

O le popolega lenei lau Afioga i le Fofoga Fetalai, ina ia puipui i tatou i le isi poto fou lea ua oo mai. E sao lava e atamai, ae i ai lava le sasi e i ai foi le sese i isi taimi. O sao o aiga i na vaitaimi, sa leai nisi e lagolago ma fautuaina. A o lenei taimi, o lea ua tulai mai Afioga i loa e lagolagoa sao.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai....

FOFOGA FETALAI: Malie le sui usufono se i tulai mai le Palemia.

Susuga Hon Tuilaepa Auelua Fatialofa Lupesoliai Lolofietele Neiote Aiono Galumalemana Dr. Sailele Malielegaoui: A talanoa le Malo e talanoa i tagata foi ia e omai mai fafo e le fai mea faapito, pe faailoga lanu. O le mea lea e fautuaina ai le sui usufono o lo o saunoa nei, le Afioga ia Faumui Fong, e soloiaese le reference i tagata Saina, leaga e le lelei i le faalogo mai foi a lena Malo, o lea o lo o pito tele a latou fesoasoani o lo o aumai, ae sau pea i le tau lautele, o i latou mai fafo e omai e teufaafaigaluega a latou seleni i Samoa nei, ina ia maua ai ni galuega a tatou fanau ia e nonofo mai i aoga ma tau sue ni a latou galuega. O le mea lena o lea e taumafai i ai le Malo, o le alolofa i fanau a Samoa ia e nonofo mai aoga a o lea e tau sue ni galuega. E leaga foi lea mea o le o soo i fafo e tauapu, e le fetau mo fanau aoaoina a Samoa. A o lea la tatou te sailia so o se ituaiga tagata mai fafo e i ai ni a latou seleni e mafai ona aumai ma teufaafaigaluega iinei, ae maua ai ni galuega a Samoa ma maua ai ni tatou tupe se tele e fai ai a tatou galuega. Ae aveese lena faapito ia Saina le finagalo o lau Susuga Faumui Fong e le lelei i le va i fafo.

FOFOGA FETALAI: Masalo e ao ona aveese mai ia tatou faamaumauga e faasaoina ai foi lo tatou va sootaga lelei ma Malo o lo o tatou faipaaga faapea foi lo latou faatuatuaga.

Tulai mai le sui usufono e saunoa.

*Upu na faatonuina e le Fofoga Fetalai e aveese mai Faamaumauga:
[a o lea la ua omai ma Saina].*

Afioga FAUMUINA ASI PAULI WAYNE FONG: Faafetai lava i lau Afioga i le Fofoga Fetalai, faafetai foi i le Palemia. O le taumafai atu lava o le mataupu leaga o lea sa taua Siamani analeila, faapea lava au ia ai ua faataga ona tau atunuu. Ae toe faafoi ma la a matou Saina ae tuu atu i ai e o lo o afifio mai fafo.

O le agaga lena lau Afioga i le Fofoga Fetalai, ina ia tatou taumafai e puipui lava si tama'i 80 lea ua i ai i le taimi lena ina ia mafai ai ona tatou... Aua leaga o lea... Ae silasila foi lau Afioga, e i ai lava isi itumalo ma isi nuu ua leai ni fanua tau Samoa o totoe ai. O lo o taumafai lava, o lea foi sa tulai atu le sui usufono mo Faleata i Sisifo, o lo o taumafai si ona nuu ua leai se fanua tau Samoa. O le popolega lena, lau Afioga, e lelei lo matou nuu o lea lava e i ai fanua Samoa, faapena foi ma le itumalo. Ae o le taumafaiga lena ina ia gata ai i i lau Afioga i le Minisita, ia tatou o ese atu ma lena Maota e le o avea i tatou ma sui usufono ua alu ai i lalo le pasene o fanua a le atunuu, ua aveese atu i tagata i fafo. Ia, o se vaivaiga lena. Ia manuia lava le Fono i lena aso. Faafetai.

FOFOGA FETALAI: Malo. Talu ai ona o lea ua tatou toai taunuu i le tulaga e tuuina atu ai le...

Afioga Peseta Vaifou Tevagaena (Faasaleleaga Nu.4): Lau Afioga i le Fofoga Fealai.

FOFOGA FETALAI: Ou te faamalulu atu, ua manatu i le agaga ava atu i le paia o le Palemene, o lo o tele foi sui usufono ua faapena ona faaoo mai a latou talosaga. Ua ou manatu a afisi se tasi o sui usufono ae le talia se tasi o sui usufono, o lona uiga ona faitauina lea o le Nofoa.

Ae faamalulu atu, o lea lava e pei ona ou fai atu, e maua avanoa i le tuuina atu i le Komiti, ona toe tuuina mai foi lea i le tatou Palemene i le lumanai i le Fono e sosoo ai. O le tulaga lena o le Tulafono Tau Faaofi.

Afioga Peseta Vaifou Tevagaena: Faafetai lau Afioga. O le a ou le... ona o lea ua malele lau Afioga. Ae silasila foi, sa ou nofo taputapu lava a o alofaiva le Palemene. E faigata tele i le itumalo lenei leaga e faigata le faaaloalo i le Malo na tuu atu i lou nuu ma lou afioaga. O le agaga lena na ou manatu ai lau Afioga i sina minute. O le Tulafono Tau Faaofi ua lagolago e lenei itumalo, ae e i ai lava si vailiu taua e momoli atu ai e lou itumalo, pe afai e talia e lau Afioga i le Fofoga Fetalai. Na o sina minute lava po o le le atoa foi se i faafogafoga si ou itumalo, leaga o le latou finagalo na aumai.

FOFOGA FETALAI: E fia minute? E tasi a? Se i faaemo mai pe mata e a?

Tofa Nafaitoa Talaimanu Ketu (Gagaemauga Nu.3): Lau Afioga i le Fofoga Fetalai, e fia maua foi ni nai minute o o matou sui usufono, pe a tusa ma le tofa i le Nofoa.

FOFOGA FETALAI: Se o le mea lena o le fai ma e alaala mai lalo, semanu ua uma le minute.

Afioga Aliimalemanu Alofa Tuuau (Alataua Sisifo): Lau Afioga i le Fofoga Fetalai....

Afioga Peseta Vaifou Tevagaena: Leaga o lea na saunoa le Palemia, ou te fefe tele ia tatou Tulafono Tumau. A e saunoa loa, ona ou nofo lea i lalo, ou te ava tele i lau Afioga.

FOFOGA FETALAI: Ia faafetai. E minute le sui usufono mo Faasaleleaga Nu. 4, minute le sui usufono mo Alataua i Sisifo.

Afioga PESETA VAIFOU TEVAGAENA: Lau Afioga i le Fofoga Fetalai ma le mamalu o lena itu o le Maota, malo faafetai mo lenei Tulafono Tau Faaofi taua. Ou te talitonu foi o le lauga mulimuli lava lea o lenei Tulafono Tau Faaofi taua. Ua ala ona ou tulai atu, o le momoli o le faafetai i lau Afioga i le Palemia faapea foi lau Afioga i le Sui Palemia e ana lenei Tulafono Tau Faaofi, faamalo faafetai. Faamalo le fai o le faiva. O le Tulafono Tau Faaofi lea ua fofola, o le manuia lea o le atunuu. Silasila foi i le tele o tausaga o taoto eleele o si o tatou atunuu, o le tele lava e le o galueaiina. Ae o le a ou talanoa pea i lou lava itumalo, o le ala lea o lou talosaga lau Afioga i le Fofoga Fetalai i sina minute lava. Masalo o le Paeaiga e 2006 a o lo o seei le Afioga i le sui usufono mo Palauli le Falefa e avea ma Minisita o Eleele, lea na mafua ai le Tulafono lea. Na masii mai lava si ou nuu i Puapua, lea e afio mai le Palemia ma nisi tuai o le Kapeneta e momoli le faafetai i le Malo ona ua talia e le Malo

le talosaga a si ou nuu, 800eka. Na talosaga mai Puapua i le Malo ina ia faatulafonoina ina ia mafai ona faalisi atu. O lenei eleele, e leai lava ma se mea e ola ai na o le papa lava. E faapena foi i si ou nuu i Samalaeulu, leaga e sosoo atu lava nuu ia. Na o le lava a le mea la e taoto ai e leai lava ma se isi mea e ola ai. O lea na ou talanoa i le Afioga i le Minisita o Tupe ananafi, ona e i ai le poloketi tele lea ua fuafua le Malo e saili se eleele i Salafai e faatu ai. Ma ua ou manatu o lea poloketi, e talafeagai tonu lava ma si ou nuu, leaga e moomia lava ituaiga eleele e i ai le lava i Lealatele. A o lea ua maua atu o lea ua saunao le sui usufono mo Saleaga Sasae e uiga i le Tulafono Tau Faaofi.

O le mea lea ou te faafetai ai i lau Afioga i le Fofoga Fetalai, faafetai i le Malo i le Tulafono Tau Faaofi, atonu o lea o le a maua ai se fesoasoani mo si ou nuu ma lou itumalo i le 800 eka e fia galueaiina. O lau faafetai puupuu lea. Ia manuia le Fono.

FOFOGA FETALAI: Malo faafetai. Ia, o le a tuu atu la le avanoa i le Afioga i le Sui Fofoga Fetalai e fai ma sui usufono mo lea itu. Tulai mai lau Afioga i le Sui Fofoga Fetalai. E tasi le minute lau Afioga i le Sui Fofoga Fetalai.

Afioga Faaulusau Rosa Duffy-Stowers (Gagaifomauga Nu.3): Lau Afioga i le Fofoga Fetalai faamolemole e fia maua foi so ta avanoa.

Tofa NAFOITOA TALAIMANU KETI: E filitalanoa lava le tatou Fonotaga, a o lea e afio lau Afioga i le Fofoga Fetalai, o lo o ia te oe le foe e foe ai, foe pisi, ia e faapea foi foe o lo o magoto lelei aua lenei taeao ma le Fonousu a le atunuu. Faafetai mo le avanoa o Gagaemauga Nu.3. I lau Afioga ma le faaaloalo o le a le toe oo se faamatalaga i le tulaga o lo o taoto ai mokesi ma lisi. Ua manino le mata o le vai i le Gagaemauga Nu.3 i tulaga uma, i tulaga o Tulafono ua malamalama i ai. Peitai lenei Tulafono Tau Faaofi e ao lava ona ou faaleo o la e faafofoga mai lou itumalo, i le afua mai i Asufaata ma Fanuatanu seia paia Maloamata. O le agaga maualuga e fia momoli le agaga faamalo ma le faafetai i lau Afioga i le Palemia lau Afioga i le Sui Palemia e ona le Tulafono Tau Faaofi lenei, malo silasila mamao. Faafetai mo le aumaiga o lenei mataupu, e ui lava ina luga lalo le atunuu, ae sala ina luga lalo, leaga o le faasinomaga o le eleele. A ua ou tautala ma le agaga faaaloalo e faaleo se finagalo o lou itumalo matou te lagolagoina le tuuina mai o lenei Tulafono Tau Faaofi. E afua i se a? O lo o atagia i i le tele o faafitauli o lo o tutupu i si o tatou atunuu e foia ai i i, e pei lava ona saunao nisi o sui usufono, ou te talanoa i benefits o lenei Tulafono Tau Faaofi i tagatanuu aemaise o si o matou motu i Salafai. O le tulaga maualuga ia te au, o le foia ai o le faafitauli o le de-organisation, po o le agai mai o tagata i totonu o le taulaga.

Lau Afioga i le Minisita e ana lenei Tulafono Tau Faaofi, o le tasi lenei o fofo, aua afai e mokesi pe lisi po o a lava tulaga o le a lisi fanua o le matou itumalo, e i ai lou talitonuga, e le toe agai mai Salafai i Upolu nei. O le vaaiga mamao lea a le Malo e ala ai ona lagolagoina e lenei itumalo. O lo o i ai foi le tulaga i mea tau traffic jam i le tele o taavale ua i ai nei i le tatou atunuu i le tulaga o feaoaiga. Peitai afai e lisi ma tuuina atu i tagata e tele a latou seleni i le Itu o Tane, o la e tele o matou fanua lau Afioga, o le tasi lea o fofo o lea faafitauli.

FOFOGA FETALAI: Ia, faaiu mai le saunoaga a le Sui Fofoga Fetalai.

Tofa NAFOITOA TALAIMANU KETI: O le ala lea o lou tulai atu, tau lava ina saua i le va ma faitau ane ai le lagolagoina e lenei itumalo. O le isi itu e taua ai ia te au, o le alu ai i lalo o le crime rate o mea uma nei, e afifi ai i le tulaga o i ai le Tulafono Tau Faaofi, e maua avanoa e faatinoina ai ni atinae i totonu o Salafai aemaise o si ou itumalo. O le mea lea leaga e utiuti le matou taimi, ae tau lava ina faailo se lagona o lenei itumalo e lagolagoina atoatoa le Tulafono Tau Faaofi ona e i ai ona taua mo i matou i Salafai. Ma le faaaloalo lau Afioga, faafetai mo le avanoa.

FOFOGA FETALAI: Malo faafetai. Ia, talu ai ona ua solitulafono tele le itu lea o le Maota, o lea ua ou manatu ai sa tatau ona tuuina atu le avanoa i tamaitai ia pei ona tuuina avanoa i faipule tamaloloa tulou, e tatau foi ona tuuina atu i sui usufono tamaitai ina ia paleni. Ae alolofa sui usufono tamaitai, se tatou o i le minute e tasi. Ia, o le a tuu atu le avanoa i le sui usufono mo Alataua Sisifo.

Afioga ALIIMALEMANU ALOFA TUUAU: Faafetai mo le avanoa. E toasefulu le matou itu lea sa tutulai, ou te talitonu e tatau foi la ona sefulu ou minute e faapea foi la lou uso sui usufono tamaitai e faapaleni ai le matou itu. Lau Afioga i le Fofoga Fetalai, e lagolagoina e le Alataua Sisifo le Tulafono Tau Faaofi i le tulaga lea o le faamalosia ma faaleleia aiaiga po o auala e mafai ai ona puipuia atili eleele faale-aganuu, ae maua ai foi le avanoa e atiae ai le tamaoaiga o le tatou atunuu, aemaise lava le tele o fanua e le o faaogaina.

Lona lua, o le isi itu taua i mea nei o lisi, ia silafia ai e tagata e mafai ona latou nono mai tupe mo atinae pe a talia lena e faletupe fua i a latou aiaiga. Ma o le a faamalosia ai foi tagata e galueaiina o latou lava laufanua.

O le atinae o le tamaoaiga o le atunuu e taua tele, aua lava le ausia o se tulaga siitia o le soifuaga o tagata, e pei ona tatou lalafo atu le tele o manaoga o tatou itumalo, ae le lava le faasoa a le Minisita o Tupe. O le itu aupito taua ia Alataua Sisifo, e le o fai mai le Tulafono, o le sa'o e pule aoao, a o lea e fai mai o tagata e faamanuiaina ai. O le faavae na aumai e taiala ai lo tatou atunuu mo tagatanuu, i se vaivaiga la, e tatau ona fuafua lelei ina ia talafeagai lo tatou faavae ma le suiga o le soifuaga. O le suiga la lea o le soifuaga lea ua alagatatau ai le Tulafono Tau Faaofi lenei, ma ua tatau ona tatou puipui i mea ua fetau ma i tatou ona o le olaga o lo o agai i luma, ma e tatau ona limataitaiina i tatou e taiala e fetau ma lenei vaiata. Ou te talitonu o lo o faasino lenei Tulafono Tau Faaofi i fanua ua uma ona faatoa. I sou lava vaivaiga, o fanua lava e te taina i le vaomatua, o lou lava lena fanua. I le saoasaoa lea ua i ai nei i le itu lava i le taina o le vaomatua, ia pe toatasi lava pe toalua ni tagata maemae e mafai ona la aveina uma se eleele o se vaomatua i se itumalo. Ma e ao foi ona tatou puipui i le itu e faatapulaaina ai, pe 100eka pe 200eka e mafai ai ona aveese ese toatasi pe toalua ni fanua, ina ia mafai ai ona aua ne i aveesea e se toalua i luga o le faiga lea fanua ina ia mafai ona lisiina atu. Toetiiti lava uma.

O le isi manatu, pe tatau ona i ai se aofaiga aupito maualuga o fanua e tatau ona lisiina atu, pe 20eka i se aiga e tasi, po o e faamanuiaina ai. Ina ne i lisiina atu uma eleele o se nuu ae fai ma alofaga e le galulue ai le aufaifaatoaga. E le afaina nuu tetele o lo o tele eleele lea foi o lo o lelei le faatoaina o fanua, ma e ao ona lisiina atu o latou fanua.

O le manatu mulimuli, se i tagai ane pe faapefea fanua ia e faafesuiai i le va o aiga, aemaise le tulaga faigata i nisi o nuu lea e i ai le pule faavae. Ou te talitonu faatoa faalavelave lava pule faavae pe afai o le tagata o lo o ona faaaoga lea fanua ua ia ofoina atu se lisi po o se mokesi. Ia ona faauma lea o le tala, o lou fiafiaga sili i le Tulafono Toe Teuteu lenei, ua fetau tonu lava ma le fuafuaga a le Malo lea sa saunoa i ai le Afioga i le Palemia i le toe faiina lea o le matou uafu i le Itu Asau, lea e faapea e \$20miliona lea o le a faaalu ai i lo matou faaitu i galuega o le toe fausiaina o le uafu i le Itu Asau. O lau Faafetai faapitoa lena i lau Afioga i le Palemia, ma e mautinoa o le a manaomia ai nisi lisi o fanua o le Itu Asau ina ia faia ai nisi o falefaigaluega po o fale i'a ma maua ai le tamaoiga i si o matou faaitu.

Ia o nai manatu na e fesoasoani ai i le tatou Tulafono, a o le aotelega, o le lagolagoina o le Tulafono Toe Teuteu e Alataua Sisifo. Ia manuia lenei Fono.

FOFOGA FETALAI: Faafetai. Ia, toe pau lenei o le sui usufono o le a tulai mai o le sui usufono mo Gagaifomauga Nu.3. E faamalie atu le sui usufono mo Anoamaa Sasae, ona o le manatu i le tatou taimi, ua faapena ona see foi le vaa o le Nofoa, i faitauina mai foi e le atunuu a mea ua tele tonufai ma faaiuga e tusa ai o lenei mataupu.

Tulai mai le sui usufono mo Gagaifomauga Nu.3.

Afioga FAAULUSAU ROSA DUFFY-STOWERS: Faafetai tele lava i lau Afioga i le Fofoga Fetalai mo lou avanoa. Sa ou faapea o le a le maua se avanoa, ae faafetai lava le faaaloalo. E faaleoina foi le agaga o le lagolago i lenei Tulafono Tau Faaofi ona ua alagatatau ma e malie ai foi saunoaga ma tuleiga ua mavae atu i le aoga tele o lenei Tulafono Tau Faaofi i tulaga uma e pei ona faasoasoina i vaega eseese o le Tulafono Tau Faaofi. A o nai motugaafa lea o se manatu e avatu e poupu ai ma faamalositia le tatou Tulafono Tau Faaofi ina ia fai se vaega foi lele o e mea e mafai ai ona i ai le aia a le tagata e ana le fanua e i ai lana aia e mafai ona ia taofia le lisi pe afai ua le talafeagai le activity la e fai i luga o le elelee ma tulaga sa i ai, po o le bridge, o se faaupuga lata mai o se except clause. A faapea foi pe a tusa ai ma le finagalo o lau Afioga i le Minisita, o le leasee lea e alu atu e lisi le elelee, pe mafai ona aua o lea a faapea e manao e mokesi le elelee, e mafai ona impose i ai se fee i luga e faamatuu atu lea i le e ona le elelee, aua ana leai le fanua lea e fai ai i luga lana lisi e le mafai ona apalai sana mokesi ina ia faamanuiaina ai foi le ona le fanua.

Ia, o le lona tolu, ia matuai maioio lelei i totonu o aiaiga ituaiga pisinisi o le a faia i luga o le lisi, aua ne i te i ua i ai nisi pisinisi e avatu i tua e le taitai ona talafeagai ma tu ma aga a nuu ma afioaga.

Ia, o le lona fa, afai ae alu le tatou Tulafono Tau Faaofi lenei ae manuia, o le a tele mai ni investors o le a gasolosolo mai, ia tataua ona mafai ona faasoasoa lelei foi lea ina ia mafai ona laugatasia uma ai itumalo uma i le faasoasoina o ni faamanuiaga o le a maua mai i lenei Tulafono Tau Faaofi i ni investors o le a afifio mai.

Ma le mea lea sa saunoa i ai le Afioga i le sui usufono mo Alataua Sisifo, ia faatapulaa le aofaiga o le faamatuu atu o elelee i se aofaiga o eka e mafai ona faamatuu atu i mea e lisi atu lea i le aufaipisinisi.

Ia, ona faauma ai lea o se faamatalaga i le faafetai tele i le Afioga i le Palemia ma le Faigamalo i le uafu lea ua taua mai ua maua atu ai le fesoasoani o le a

toe amatalia ai le uafu i Asau ona o lea foi e pipii atu i ai si ou nuu o Aopo. Ma lou faaaloalo tele lava. Faafetai.

FOFOGA FETALAI: Malo faafetai. Ma ou te faamalulu atu Alaiasa, ua ou taua lou suafa mo le faafofoga mai a le itumalo, aua a tatou toso loa i tua ua le mafai ona tali le Malo mo le aso faamolemole lau Afioga.

Afioga Alaiasa Muagututia Moefaaauo Malagaitutogiai Sepulona Moananu (Anoamaa Sasae): Ia, sa faapea lava na o se matou minute, ae ui i lea, o le a olo lava le fua i le pule tutasi a lau Afioga i le Fofoga Fetalai. Faafetai.

FOFOGA FETALAI: Faafetai lava le faaaloalo Alaiasa, e le tauilo faiva leaga e lua ou pulou lena e te nofo ma oe, o oe o le Sa Fenunuihao, o oe o le Tumua, e tolu o oe o le alii faifeau. Malo faafetai, faafetai tele lava, e leai se isi sui usufono i le Palemene pei o oe o lou uso.

Afioga Alaiasa Muagututia Moefaaauo Malagaitutogiai Sepulona Moananu: A ua leai foi se avanoa, ae tatalo atu ua lava foi lea a gasea lau Afioga i le Fofoga Fetalai.

FOFOGA FETALAI: Faafetai. O lea ua ou iloa ua uma ona faamanino ma faapupula nisi o mea sa laga e sui usufono o le Palemene, ae i ai le manatu o le a tuuina atu loa le fesili.

Ia, tulai mai lau Afioga i le Minisita mo Punaoa Faalenatura ma le Siosiomaga.

Afioga Hon FIAME NAOMI MATAAFA: Lau Afioga ua saunoa foi le Afioga i le Taitai e tatau lava ona upu mulimuli le Malo.

FOFOGA FETALAI: E faamalulu atu, faapea lava ai ua uma ona tali.

Afioga Hon FIAME NAOMI MATAAFA: Faafetai. Ou te lagona lava le agaga faafetai i saunoaga ma fetalai i le Maota i le tatou Tulafono Tau Faaofi Toe Teuteu lenei. Ma a sala foi ina umi ma tuu avanoa mai lau Afioga i le Fofoga Fetalai ua tatau, aua e pei ona saunoa mai foi le toatele o sui usufono mamalu o le Palemene, ia o le eleele o le tatou Tofi, ia o le fatu foi lea o le tatou aganuu ma le tatou nonofo ai.

Lau Afioga i tulaga masani o felafolafoaiga i le faitauga faalua, e tatou te talanoa felafolafoai i itu tetele, i itu faavae o autu o Tulafono. Aua i le faagasologa o tatou Tulafono o lo o maua avanoa, aemaise a maea lenei felafolafoaiga, o le a faapea ona faasolo atu i le tatou Komiti, maua ai foi nisi avanoa e toe faamatala atili ai ma faamanino, ia pe toe teuteu foi e tusa ai ma finagalo ua faaalua i le tatou Tulafono. Ona toe avanoa foi lea i le toe foi mai i le Maota nei i le auililiga o le Tulafono, ia ou te talitonu o ala o mea ia o le tatou galuega, e faapena ona tatou saili ai mea sili mo Tulafono e faapea ona faafoe ai ia lo tatou atunuu i ona vaega eseese.

Ou te faafetai e pei e tau ina ese foi ia le felafolafoaiga i lenei Tulafono, e ui e faapea o le Tulafono ua tuuina atu e le Malo, ae ua i ai lava lou lagona ua autasi se finagalo o le Maota o le Tulafono a tatou uma. Ma i le felafolafoaiga o lo o afifi ai i totonu lagona o lo o lagolagoina, o nisi o atugaluga o lo o faatulai

mai, ia po o lo o manino mai foi le tetee o nisi o finagalo i le tatou Tulafono. Ma e ou te manatu o le uiga lea ma le natura o le tatou galuega. Ma e ou te talitonu e leai se agaga o le Malo e tineia finagalo faaalua o sui usufono, aemaise i se Tulafono ogaoga faapenei e aafia ai uma tagatanuu o Samoa. Ma e lau Afioga i le Fofoga Fetalai, i le aoatetele, o lo o maua atu muamua, ia atugaluga ma popolega o le Maota, ina ne i lava ona see atu ia o tatou fanua faale-aganuu ma aveia ma fanua umia saoloto i le upu lava lea faaliliuina.

Ma e o lea foi ua saunoa atu ia le Palemia, e le gata i totonu o le Maota nei ae o tua tau i faaaliga i luga o faasalalaua eseese o lo o avatu ai pea le agaga o le Malo, e avatu ia le mau, e le o i ai se faamoemoe e faapea o le Malo i le tatou Tulafono lea, ina te i ua outou faapea mai i a outou saunoaga aemaise o le faafofoga mai a le atunuu, pe o nana le lima tui tagata o le Malo faapea se faaupuga. Pe i ai se mea faalilolilo o lo o i ai i le finagalo o le Malo i le Tulafono lenei.

Ma e lau Afioga i le Fofoga Fetalai, ou te toe faapea atu, e le o i totonu o le Tulafono lenei se faiga, se faauigaina, po o se faaupuga, e mafai ona liliueseina ai ia fanua faale-aganuu. O le isi itu lautele o lo o saunoa mai ai a outou Afioga, ina ia malupuipua lava latou e ona fanua, beneficiaries. Ma e malie foi le saunoa mai o le tasi o sui usufono, talanoa mai le Tulafono o i latou e faamanuiaina, e ala i le lisiina o tatou fanua ia beneficiaries.

O le isi vaega o lo o talanoa mai ai ia isi o tatou sui usufono mamalu, o le tuufaafegai ai o le Tulafono lenei ua tatou talanoaina ma isi Tulafono o lo o i ai. E pei o le tatou Tulafono o le Resitalaina o Fanua i le 2008, o le Tulafono o le Avea o Fanua, o a tatou Tulafono aemaise le aveia o le Faamasinoga o Fanua ma Suafa, aua o Tulafono uma ia e ono papai atu i ai ia le Tulafono lenei tatou te talanoa i ai. Ma e taua ia finagalo ua faaalua, aemaise ai lava ia Tulafono o lo o faatatau i fanua, le Land Property Act. O le tatou Faamasinoga o Fanua ma Suafa o lo o gafa ma Fanua nei ma Suafa o le tatou atunuu.

Ia o le isi mataupu o lea o lo o ou maua atu faapea mai, pe ua i ai se vaaiga e na o tagata mai fafo po o tagata faipisinisi e mafai ona latou faia ni lisi. Ia atonu o lea ua uma ona saunoa foi le Afioga i le Palemia ma faamalalalama, leai e avanoa lava tagata uma, aiga Samoa e mafai ona fai foi a latou lisi, e atinae ai o latou aiga.

Lau Afioga i le Fofoga Fetalai, ia e pei ua auala mai foi i lenei Tulafono ia nisi o talosaga a itumalo, ia aemaise lava le faatatau lea o le lisi atu o fanua o le Malo ia mo nuu ma afioaga. Ou te faamalulu atu, o le tatou Tulafono lea o lo o i le Laulau a Fono, o le Lisiina o Fanua Faale-aganuu. Atonu e i ai isi ala, e i ai isi Tulafono, e mafai ona tali atu ai i le laga mai o sui usufono mamalu, o le itu lea o le lisiina atu o fanua o le Malo, mo nuu ma afioaga.

Ia atonu o le uiga lava lea o le tatou galuega i lau Afioga i le Fofoga Fetalai, a maua loa le avanoa, ave loa. Ae ou te faamalulu atu i a outou Afioga i le itu lea, ia atonu o se isi Tulafono po o se isi foi auala, e mafai ona tatou tali atu ai ma galulue e uiga i na mataupu. Lau Afioga i le Fofoga Fetalai, e pei o le aootelega ia o mataupu lea o lo o saunoa mai i ai ia sui usufono.

Ae o le isi lava mataupu lea e pei e tautala mai pea i tua ma e o lea ua mafai ona faaleo mai e lauga ia ua mavae atu nei, po o a tatou taga ia e fai e faasino i o tatou fanua? Po o a tatou taga ia e fai e uiga i o tatou suafa? Aua e o faatasi suafa ma eleele. E fai ma faaitaiga lau Afioga i le Fofoga Fetalai, o le mea lea ua i ai nei pe a tatou talanoa i le pule faa-Sa'o lea e laga mai foi e nisi o sui usufono, e i ai suafa sa'o, e tele suafa sa'o ua faasalafa, ma e mafai ona faapea,

ua oo ai lava, ua tuli ai lava ia le puiaiga ia po o le tino, o le latou sa'o lea, o le latou suafa lea, o latou fanua ia. O lona uiga, pei o lea tatou te talanoa i le Tulafono lenei, e pei e foliga mai, o fanua uma nei, o fanua e pule uma ai tagata. Ioe. A o lea pei e i ai le isi uiga faapea tatou te faasea i sa'o o aiga. O le fesili, e fia sa'o o aiga ia e afifio i totonu o le Maota lea? Ae fia foi sa'o o aiga ua faapena ona faasalafa ma o lea ua oo ai le mea lea e tupu, le mea lea e savavali ai vae o tatou i le umia o tatou fanua?

Aua e mafai lava ona ou faapea atu, lau Afioga i le Fofoga Fetalai, le mamalu o le Palemene, pei e ese lava tatou tala ia e fai, pei se tala pei se miti i le matagofie ma le lelei o le aganuu faasamoa, e pule uma lava tagata uma i fanua. Ae o le mea lea e tupu, i le fesootai o suafa ma eleele, leai lea ua amata ona tuli, tuli lava faapitoa le fanua o le aiga ia. Aua ua uma aso, tasi le sa'o, tele ogaumu, faasoa ia fanua. A o le suiga o le olaga. Ou te le faapea atu a mea po o se mea lelei, po o se mea leaga le mea lea, a o le mea lea e tupu, o le mea lea e tupu, this is our reality, ae ese lava le mea lea tatou te faalogo i ai ma tatou talanoa i ai, pei o lea lava tatou te nonofo i se lalolagi foi lea e ese le matagofie tatou te pule uma, pule faatasi i o tatou fanua.

O mea ia tatou te mafau i ai, o le laga mai foi o le.... ma e o faatasi la ia le mafaua lea ma le isi mafaua lea faatoa maua mai nei lava i le saunoaga a le sui usufono a Alataua Sisifo i le mea lea o le ta o le vao, ta o le vao. Fea le tulaga tulaga tutusa o avanoa, tutusa o le pule, tutusa o le malosi, pe a alu atu lava le tagata ia ta le vao o lona fanua lea. Pe tau lava le suafa, a o le suafa lava e faasinotonu i le tagata lea na taina le vao. Ona i ai foi lea o le mafaua, ta le vao, sao i ai lona aiga, ma fanau a fanau, ma fanau a fanau, ma fanau a fanau, seia oo i le faavavau, pe nonofo ai pe leai. Ona fea lea e taatia ai le pule ma le avanoa tutusa o tagata i o tatou fanua? Ia te i ua faalautele lau Afioga i le Fofoga Fetalai, ia le mataupu aua e faigofie lava ia si a tatou mataupu lea tatou te talanoaina ai, o le lisiina ma mokesi o fanua faale-aganuu.

A o le siosiomaga lea tatou te i ai i le mataupu lea, o lea ua aumai e le Malo le Tulafono, ma e ou te fia toe faamalamalama atu lava i a outou Afioga i sui usufono, e lua lava Tulafono o lea o lo o tatala mai i lalo o le Faavae i le vaega o le 102 lea e talanoa mai tele i ai nisi o tatou, o le Tulafono lea, lea tatou te talanoaina nei, Faaliliuina o Fanua Faale-aganuu, e Faataga ai Lisi 1965, le Tulafono Autu 1965, o le a le mea e tau mai e le 1965? 1962 tatou Tutoatasi, 1965 fai le Tulafono lea, aisea? Ona o lea ua vaai atu le Malo, faafefea ona fai le atinae? Faafefea ona momoli atu auala? Eletise? O vai? E ui atu i luga o fanua faale-aganuu? Fai ai le fuafuaga lea, faataga mai i lalo o le tatou Tulafono Faavae, ia lisi.

Ia ae o le isi Tulafono, o le Tulafono lea o le aveina o fanua, na muamua atu, 1963, taking of lands, mo le mafuaaga lea ou te faamatalaina atu, ina ia mafai ona faatino le galuega a le Malo, e momoli atu le auaunaga mo le atunuu, ae manaomia le ui atu i luga o fanua ma eleele faa-Samoa.

O le mea la lea lau Afioga i le Fofoga Fetalai, fai ai lava si popole o lou loto, aua o le agaga o le Tulafono, o le agaga lelei, o le agaga e atinae Samoa. E le gata i le Malo ma ana galuega, ae ia atinae lava aiga ia, e ala i luga o lisi ia ma mokesi lea tatou te talanoa nei i ai. Ae paga lau Afioga i le Fofoga Fetalai, talanoa mai nisi o sui usufono faapea mai ua tatou solia le Faavae. Ou te ofo! O saunoaga ia ma manatu e faaoloatauaina ai le atunuu, ioe, faaoloatauaina ai. A o lea ou te faapea atu, a outou Afioga i alii ma tamaitai sui usufono, tilotilo

i le Tulafono Faavae, e lua lava Tulafono lea e tatala mai, o le Tulafono lenei ma le Tulafono o le Aveina o Fanua. Ona o le a? Ia faatino le atinae o le atunuu.

Ou te tatalo atu, o le a ea le mea na tofi mai ai tatou e le atunuu? Na tofi mai tatou tatou te o e fai ia tonu ma faaiuga ina ia manuia ai Samoa. E faapena le Tulafono Tau Faaofi lenei. A o le fai o lafoga e faaoloatauaina ai finagalo o le atunuu ma taitaiseseina ai le faalogo, e le gata i matai o le atunuu a o a tatou fanau, oka! its irresponsible. E le o se mea lea e tatau ona fai e sui usufono, o le olegia o le atunuu. Aua e le sao le tala lea ua fai, ua talepe le Faavae. Silasila i le 102, e lua lava avanoa ia e aumai i le Tulafono lea o lo o faatino nei.

Tofa Olo Fiti Afoa Vaai: Lau Afioga i le Fofoga Fetalai o se mea e fia faasao...

FOFOGA FETALAI: Malie le sui usufono, se i maea le saunoaga a le Minisita.

Tofa Olo Fiti Afoa Vaai: Ona o lea ua oo tonu i le...

FOFOGA FETALAI: E le o taua lou suafa o lea e saunoa.... Malie le sui usufono se i...

Tofa Olo Fiti Afoa Vaai: A o au lea sa talanoa atu i le talepe o le Faavae e pei o le mea lea ua ou tulai atu ai. Ma le agaga faaaloalo lau Afioga, e le umi foi le faamalamalama o le uiga o le faamatalaga.

Lau Afioga i le Fofoga Fetalai...

FOFOGA FETALAI: Malie le sui usufono, ua iloa foi le mea seiloga e alaala i lalo le Minisita ona faatoa talia lea o lou finagalo, a o la e la e manao le Minisita e faaauau lana saunoaga. Se i maua lou avanoa i se taimi mulimuli.

Tofa Olo Fiti Afoa Vaai: Faafetai.

Afioga Hon FIAME NAOMI MATAAFA: Ioe, lau Afioga i le Fofoga Fetalai, e maitauina e le Maota, e seasea ou tulai atu e tali atu i taimi o a outou saunoaga, ona e taua foi le tuliloa po o fea le mea lea e tatai i ai outou finagalo. O lea la ua maua lou avanoa ou te fia tali atu ai i le mea lea. E le se lafoga mama le faapea mai o le Tulafono Tau Faaofi lenei ua talepe ai ia le Faavae. Ma e leai foi se agaga faapea o tatou uma o tagata faitulafono e i ai nisi o tatou ua leva ona i le Maota lenei faapea e le mafai ona suia le Faavae. E mafai ona sui le Faavae i luga o aiaiga o Tulafono o lo o i ai. A o le mea e faalagolago i ai, o le faatofalaiga a sui usufono mamalu o le Palemene. Ma o le itu lava lea ou te fia tautala atu ai, lea tou te faapea mai o le Malo ua fai le mea lea, o le Malo ua fai le mea lea, o le Malo ua fai le mea lea. Oi, a manatu ea o se Malo e nofonofo, a o le a le uiga o le tofia o tatou? E leai se mea e afaina ai le faaleo o popolega, o atugaluga aua o mea e tatau ona faaleo, ae faaiu lava, po o le a le tatou mea e fai. Aua a tatou o i le taunuuga o faitioga ia e tele mai tua ma nisi o saunoaga i totonu o le Maota i le Tulafono Tau Faaofi lea, o lona uiga, e leai se mea e faia, e nofo ai lava le 80% o eleele ia o Samoa e leai lava ma se mea e maua ai, e fuamoa aato lau Afioga. Ae ou te fai atu lau Afioga i le Fofoga Fetalai ma le mamalu o le Palemene, o le taumafaiga lenei o le faia o mokesi i

luga o lisi o fanua faale-aganuu, e le o se mea faigofie. Aisea? Aua ua lui, lui le fatu o taamilosaga o tamaoiga ma le fausaga o lo o fau ai. Aua o le manatu masani lea sa i ai, e leai lava se aoga o fanua Samoa. Ioe. E le mafai ona ave e maua mai ai ni tupe. A o le a le mea lea ua tupu? Tuitui, tuitui, tuitui le Malo, e pei o au upu amata i le faamatalaga o le Tulafono Tau Faaofi lenei, ua ova i le 10 tausaga o tau tapena mai lava lenei mea. E le o se Tulafono na faafuaveta. Ma e ala foi ona umi, e tatau ona umi, ona o le saili o finagalo o le atunuu. O lea la ua oo mai i le tatou lio lenei, o le lio lava lea e fai ai a tatou faaiuga.

O lau tatalo atu lau Afioga i le Fofoga Fetalai, tatou lototetele, tatou faia ia se tonu i se agaga lelei lea na aumai ai le Tulafono Tau Faaofi lenei. A faapea foi e i ai ni tulaga e le atoatoa, tatou tapenapena atili i ai. A o le mea lea o le tatou nonofo ma tatou fai pea a tatou miti ae ese a mea ia e tutupu i totonu o le atunuu, e i ai lava ē e latou te faaaogaina avanoa o lo o i ai, ae a le lautele o Samoa? O la e nofonofo malie lava, leai se mea e tua i ai, a o lea ua tapena e le tatou Malo le avanoa lenei e mafai ona atiae ai le aiga lava ia. E le o se mea laitiiti le aumai e le Malo o faletupe i le laulau e fai le mea lea, a o le malosi o le uunai atu e le Malo o le mataupu, lea ua liliu mai ai.

Lau Afioga i le Fofoga Fetalai, e pei o nai tali faalauaitetele na i le tatou felafolafoaiga i luga o lenei mataupu. O le mataupu lava ia e faapea lava le vaapiapi. O le toe poupou o le Tulafono lenei o le Faaliliuina o Fanua i le 1965 ina ia faamalosi ai puipuiga o e ona fanua Samoa e mafai ona lisi ma le fai ai o mokesi i luga o lisi ia. Na pau lea, pau lea. Atonu e tele nisi tapenaga e ao ona fai, ae faapena ona tatou fai ma toe vaai, toe tapena, o le uiga lava lena o le soifuaga.

Lau Afioga i le Fofoga Fetalai, o sa matou faamatalaga puupuu lea e talifuaitau atu ai i nisi o saunoaga i le Maota e tusa ai ma lenei mataupu, ia ma toe momoli atu ai le agaga faafetai i le agaga lelei i le faaaliga o finagalo ma taofi e faapena ona tatou galulue ai mo le atinae o le atunuu. Ia manuia.

FOFOGA FETALAI: Malo faafetai. O le a tuuina atu loa le fesili.

Na faamaonia le lafo ma faitauina le Tulafono Tau Faaofi o Teuteuga o le Tulafono o le Faaliliuina o Fanua Faale-aganuu 2017 i lona faitauga faalua.

FOFOGA FETALAI: E tusa ai ma Tulafono Tumau, o le a tuuina atu le Tulafono Tau Faaofi i le Komiti o le Vaega o Atinae Eeseese mo le iloiloina ma toe lipoti mai i le Fono Aoao i le Fonotaga e sosoo ai.

**TULAFONO TAU FAAOFI O TEUTEUGA O LE TULAFONO O
FETUFAAIGA O FAAMATALAGA TAU LAFOGA 2018
– faitauga muamua**

Afioga Hon TIALAVEA FEA LENIU TIONISIO HUNT: Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Fetufaaiga o Faamatalaga tau Lafoga 2018 i lona faitauga muamua.*

Faaluaina e le Minisita mo Tina ma Tamaitai, Atinae o Nuu, Afioga ma Agafesootai, Minisita o Tupe ma le Minisita mo Aoga, Taaloga ma Aganuu.

Na faamaonia le lafo ma faitauina le Tulafono Tau Faaofi i lona faitauga muamua.

**TULAFONO TAU AAOFI O TEUTEUGA O LE TULAFONO O LE
FETUFAAIGA O FAAMATALAGA TAU LAFOGA 2018
– faitauga faalua**

FOFOGA FETALAI: Talu ai ua taulimaina le Tusi Faamaonia o le Tulaga Faanatinati, o lea o le a sagai atu ai loa le Fono Aoa mo le faitauga faalua. Tulai mai le Afioga i le Minisita mo Tupe Maua.

Afioga Hon TIALAVEA FEA LENIU TIONISIO HUNT (Minisita mo Tupe Maua): Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o le Fetufaaiga o Faamatalaga tau Lafoga 2018 i lona faitauga faalua ma ou te fia tautala faamalamalama i ai.*

Faaluaina e le Minisita o Tupe, Minisita mo Faatoaga ma Faigafaiva ma le Minisita mo Tina ma Tamaitai, Atinae o Nuu, Afioga ma Agafesootai.

FOFOGA FETALAI: Saunoa lau Afioga.

Afioga Hon TIALAVEA FEA LENIU TIONISIO HUNT: Lau Afioga i le Fofoga Fetalai, ou te lagona o lo o lava a le taimi lea mo le Tulafono Tau Faaofi lenei ona o le Tulafono lenei o lo o fitoitonu lava mo le fetufaaiga o faamatalaga i atunuu i fafo.

O le sini autu o lenei Teuteuga ina ia faatinoina tiute o Samoa i lalo o le maliega a atunuu na sainia i le 2014, e faatino ai alafua mo le fetufaaiga o faamatalaga e faatatau i lafoga faatekonolosi po o le otometi, ina ia tuuina atu talosaga tuuina mai, automatic and change of information. O nei faiga fou ua faia ina ia manino ma atoatoa le faatinoina o galuega, matafaioi o lo o faataatitia mai e le Tulafono Autu, i latou o lo o aofia i le Tulafono. O nei foi suiga e alatatau ona faatinoina i se taimi vave ona o le masina o Setema i le tausaga nei e tatau ona oo atu i ai ua mafai ona faatinoina le fetufaaiga o faamatalaga tau lafoga, a o Iuni i le tausaga nei lau Afioga e amata ai ona aoina mai faamaumauga. O le tele lava o faamaumauga nei e aumai lalo ia i latou ia e invest mai lalo o le SIFA. E le taugofie foi le faatinoga o lenei galuega lau Afioga. E tele se tupe e faamoemoe e faatauina mai ai computers ma masini e faatino ai le galuega lenei. E le i lalo ifo o le \$700,000 i le \$800,000 le tupe e faaogaina ina ia mafai ona faatino le auunaga lenei ia Setema. E pei ona outou faafofoga mai o Iuni i le tausaga nei e amata ai ona matou aoina mai faamaumauga. O faamaumauga foi ia faapea... i te i ua faapea a otometi ua alu so o se faamaumauga. E leai, e i le va o le trustee o account nei o lalo o le SIFA, o latou foi e aumai faamaumauga i le Matagaluega o Lafoga ina ia mafai ona avatu i fafo i fesootaiga. O nei auala uma ua tatou faia e le atunuu ina ia mafai ai ona aveese tatou mai le tele o noanoagata i lalo o le OECD. E pei o le matafaio lene a le SIFA. O le puipuiga la o le tatou investment i le SIFA lea la ua ala ai ona faatino le galuega lenei, ma ua uma ona tatou sainia le feagaiga i

le 2014, a o lea faatoa amata ona faagaioi i lalo o le SIFA ma le Matagaluega o Lafoga. E tusa o le tele o nei faamaumauga e le aafia ai nisi o le tatou atunuu, ae mafai foi ona tatou ni tapa ni faamaumauga mai fafo e tusa ai ma i latou o le a omai e invest mai totonu o le tatou atunuu ina ia mafai ona tatou maua le sao atoa o faamaumauga mo i latou. E pei o le auga atoa lena o le Tulafono Tau Faaofi, e laitiiti lava. Masalo e pasia lava e le i taina le 1:00 lau Afioga. Faafetai.

FOFOGA FETALAI: Malo. Ia, ma ua leai se sui usufono e fia saunoa. A leai o le a tuuina atu loa le fesili, aua o lea ua manino ma malamalama le folasaga a le Minisita. Ia a manino lava le saunoaga a le Minisita, ua faapena foi ona manino auofala ma maua foi finagalo o sui usufono mamalu.

Na faamaonia le lafo ma faitauina le Tulafono Tau Faaofi o Teuteuga o le Tulafono o Fetufaaiga o Faamatalaga tau Lafoga 2018 i lona faitauga faalua.

**TULAFONO TAU FAAOFI O TEUTEUGA O LE TULAFONO O LE
FETUFAAIGA O FAAMATALAGA TAU LAFOGA 2018
– iloiloga auiliili**

FOFOGA FETALAI: E tusa ai ma le Tulafono Tumau, e amata le Iloiloga Auiliili i le Fuaiupu 2.

FUAIUPU 2: Ua teuteuina le Fuaiupu 2.

Faamaonia.

FUAIUPU 3: Ua teuteuina le Fuaiupu 10B.

Faamaonia.

FUAIUPU 4: Ua teuteuina le Fuaiupu 10K.

Faamaonia.

FUAIUPU 5: Ua teuteuina Faamatalaga.

Faamaonia.

FUAIUPU 1 MA LE IGOA:

FUAIUPU 1: Igoa puupuu ma le amataga.

IGOA: Teuteuga o le Tulafono o le Fetufaaiga o Faamatalaga tau Lafoga 2018.

Faamaonia.

Na faagasolo le Tulafono Tau Faaofi o Teuteuga o le Tulafono o le Fetufaaiga o Faamatalaga tau Lafoga 2018 e aunoa ma se Teuteuga.

**TULAFONO TAU FAAOFI O TEUTEUGA O LE TULAFONO O LE FETUFAAIGA O FAAMATALAGA TAU LAFOGA 2018
– faitauga faatolu**

Afioga Hon TIALAVEA FEA LENIU TIONISIO HUNT: Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o le Fetufaaiga o Faamatalaga tau Lafoga 2018 i lona faitauga faatolu.*

Faaluaina e le Minisita mo Aoga, Taaloga ma Aganuu ma le Minisita mo Faatoaga ma Faigafaiva.

Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoao Faitulafono.

FOFOGA FETALAI: Ia, talu ai ona o lea ua tatou taunuu i le tatou taimi manava o lenei aso, e momoli atu le faamalo ma le agaga faafetai. Malo le usufono, ua malo foi le onosai i lau Afioga i le Palemia ae faapea foi lau Afioga i le Sui Palemia ma le Kapeneta i le Malo, aemaise foi o Minisita Lagolago, o Taitaifono o Komiti eseese a le Palemene, aemaise foi o taitai o le atunuu e ala i sui usufono filifilia o le Palemene.

E faapea foi ona momoli atu malu i puega i outou finagalo, o le a foi se faamatalaga e paopapa pe taugalemalie pe sopotuaai i le tatou nonofo ai i le va o le Nofoa ma le Palemene, o le agaga lava ia faapena ona tatou taunuu i se taunuuaga lelei, aua le faafofoga tapuai mai a Samoa. E leaga foi se Palemene ae fetautauai, ae o la e tapuaia o tatou faiva e le atunuu, aemaise o Taitai o Ekalesia o lo o faanonomanu ae a se manuia o la tatou galuega.

E momoli foi le faafetai i Faauluuluga o Matagaluega ma Faalapotopotoga a le Malo, ona o latou faiva o le tuualalo ma le faufautua ma le tapuaia o le tatou faiva alofilima i lenei aso, ua maitauina lo latou sagisagi mai, ina ia faapena ona faaifo manu i le tulaga o le tatou faiga filifiliga i lenei aso. E momoli atu le faafetai, e tele foi nisi tiute ma faiva o lo o faamuli mai i lenei aso, e i ai le manatu, e avatu e le Atua i ai lo outou soifua ma lo tatou ola. Ia faamanuia foi i galuega a le Fono Aoao i le Failautusi ma le Sui Failautusi, aemaise foi o le Ofisa o le Fono ma le mamalu o tiute faa-leoleo o lo o latou tausia le filemu o Samoa ma le Palemene.

Ae tatou te le i tolopo o le a ou faaiuina la tatou Fonotaga i se tatalo.

Na tolopo Taulumaga a le Fono Aoao i le itula e 12:56 i le aoauli, seia aulia le itula e 9:00 i le taeao o le Aso Tofi, 22 Mati 2018.